

四庫全書

經部

欽定四庫全書

經部
儒行集傳卷下

詳校官監察御史_臣沈孫璉

給事中_臣溫常綬覆勘

總校官進士_臣朱 鈐

校對官中書_臣高 中

謄錄監生_臣王 宮

欽定四庫全書

儒行集傳卷下

明 黃道周 撰

儒仕章第九

儒有一畝之宮環堵之室簞門圭窬蓬戶甕牖易衣而出并日而食上答之不敢以疑上不答不敢以諂其仕有如此者

不仕者臣之志也仕者臣之義也為貧而仕則其仕已賤矣仕而不失其貧則其仕已貴矣簞門圭窬蓬

戶甕牖士之素也秉素而行之於仕不仕無所加損也上答之而有大用之心上不答之而有屈躬之事此小人所志君子之所恥也節之需曰安節亨象曰安節之亨承上道也節之臨曰甘節吉往有尚象曰甘節之吉居位中也此二者言夫抱節而仕者也不出門庭苦節貞凶言夫抱節而不仕者也仕而有不仕之心雖聖賢亦為之不仕而有仕之心雖盜賊亦為之道命未窮委運安流抱關擊柝猶之環堵也人臣以是事其君故其上不疑下不諂職業修而鄙競黜也

蕭望之初以丙吉薦得召見也時有燕蓋之事令見者夾持露索望之不肯自引出因說大將軍以吐握之事於是獨不除用望之同見露索者俱除大將軍史不三歲至光祿大夫而望之方射策為郎署小苑東門候同見者王仲翁行顧之曰不肯鹿鹿反抱闔為望之曰各從所好又何問焉若望之者可謂上答

之不疑上不答之不諂者矣然
為望之則已慙為丙吉則可也

後漢士益嚴苦自勵其初有范遷好學家貧獨宅數
畝田一頃復推與兄子其妻謂之曰君有子無立錫
之地餘祿可為後業遷曰吾備位大臣而蓄祿自封
何恥如之卒之日家無擔石焉宣秉雲陽人少修高
節見王氏專國有逆萌輒遁去後歸世祖為中丞常
布衣蔬食瓦器居室蕭然上歎曰楚國兩龔不如雲
陽宣巨公故范遷宣秉未嘗不仕也而常若未仕故
曰其仕有如此者范丹史雲恥為縣吏嘗棄衣物道
邊家疑已死遂西入關從學學成為萊蕪長去官於
市賣卜紡績以自給辟公府無被囊自隨嘗使兒拮
麥得五斛鄉人遺之一斛囑兒曰莫令尊君知兒歸
道之丹言麥已雜輒棄不取弟子見丹家藩不完載
柴落之丹還見藩有異輒拔柴還弟子問里為之歌
曰甌中生塵范史雲釜中生魚范萊蕪若范丹可謂

仕常若不仕者矣

孔奮君魚少從劉歆受春秋問難出意表歆謂門人曰吾已從君魚受道矣竇融請守姑臧長四年猶若諸生時或笑之曰君魚身處膏脂不能自潤奮守之不廢也事母孝極其珍養而身與妻子同茹蔬後拜武都太守單車就道一無所資云吳祐季英父恢為南海太守祐年十二從官父欲殺青寫經書祐諫曰南海踰越五嶺寫書成載之兼兩上為國家所疑下為權貴所望是惹政所興謗也恢撫其頂曰吳氏世不乏季子矣二十喪父居無擔石自牧豕於長垣澤中後舉孝廉為大將軍長史質責馬融之誣李固也遂棄官灌園終身如孔奮吳祐者亦可謂上答不疑不答不諂者矣

劉寔子真少貧好學賣牛衣自給手約繩目誦書博通古今以世多進趨廉讓道缺著崇讓論以風之及

位望通顯而居猶無第宅喪妻為廬杖之制終身不
御內弟智亦與共操每負薪自給誦讀不輟管輅謂
人曰與劉潁川兄弟語使人神思清發昏不假寐胡
質汝德為荊州屬掾清白子威自京都來省家貧無
車馬僮僕自驅驢單行畱宿十餘日告歸質賜絹為
齋資威跪曰大人清白於何得此質曰吾俸餘耳威
受之辭歸每早晚旅宿自放驢取樵炊爨食畢隨徒
旅復行質帳下督聞威將歸先請假還家陰齋裝至
百餘里要為徒并行時時佐營之間進飲食質聞遂
除督名其清慎如此後威歷宰牧晉武帝召見歎其
父清謂威曰卿清何如父威謝不如上問何謂不如
威曰臣父清恐人知臣清恐人不知故守約而仕不
疑不諂劉寔胡威有焉然而
子真汝德則猶見答於上也
李膺宣伯祖敏為河內太守去官還遼東公孫度欲
用之敏一夕浮海去不知所終膺父信汎海求不得

遂不要徐邀勸之乃娶生眉遂不入內終身如居喪
眉以三世孤苦自有識輒貶食毀容以喪禮自居後
仕為樂平侯相及至御史中丞晉司徒猶蕭然如布
衣身沒家無餘財子孫守其貧儉焉吳隱之處默美
姿容善談論博涉文史以儒雅標名而性特貞介一
毫不苟取喪母哭泣有雙鸛警叫之祥韓康伯母所
謂銓衡當用此人者也為晉陵太守妻猶自負薪為
廣州還妻拾沈香一片舉而投之水及為盧循所得
劉裕請之歸家惟茅屋六間不容妻子及拜太常以
竹蓬為屏風坐無氍毹席及為中領軍每月初得祿裁
畱身糧其餘悉分賑親族人紡績以供朝夕世所
稱夷齊不飲貪泉者也故守約而仕不疑不諂李膺
吳隱之
亦有焉

傅昭晉司隸咸之孫也父琰善三禮以竟陵王事坐
誅昭甫六歲哀毀如成人嘗於朱雀橋常情神不凡

為名流賞識丹陽尹袁粲辟為縣主簿每經昭廨寂
無聲入其室儼如也入梁為安成內史異物盡蟲不
敢為害遷臨海太守郡有蜜巖前後太守皆封為利
昭發與民公之縣令來餉粟置絹其上昭笑而還之
子婦家嘗餉牛肉昭受而瘞之日端居以書史自娛
無所請謁故雖身事三朝而清名不損云江革少孤
貧無師資與弟觀自相訓勗吏部郎謝朓識之天大
雪見革敝絮單席誦經史不倦因割半氈為氈卧具
而去建安王辟為參軍弟不忍離請同行因署記室
任昉歎曰雍府可謂御二龍矣後為廣陵太守陷於
魏王延明令為丈八寺碑文厲色曰已誓不為人執
筆及還朝上舉酒屬革曰卿何不畏王延明對曰臣
誼當死又何畏乎既除武陵王長史門生故吏餉遺
悉不受除都官尚書惟乘臺舸濟江舟人嫌舟輕革
於西陵岸取石十餘片克之而濟故雖嘗陷魏而風
採盜厲如傳昭江革亦可謂不疑不諂矣而傳昭江

革猶以此
見答於上

元德秀紫芝少孤事母孝將應舉自負母偕之京師
比入官自以板輿輦母行母亡廬墓側食不鹽酪無
爪剪者三年傷居貧不及親娶遂不肯婚兄子在襁
褓失母貧無乳德秀自乳之居數日潼流比能食乃
止仕為魯山令玄宗在東都命三百里內守令大合
樂德秀惟令樂工數十人連袂歌于薦于玄宗聞之
曰賢人之言也德秀居所得俸悉以給孤遺歲滿笥
惟一縑駕柴車而去愛陸渾山水居焉不為墻垣局
鑰家無婢僕歲饑或連不爨彈琴讀書陶然也

陽城亢宗貧不能得書求隸集賢院竊院書讀之晝
夜不出戶六年學益通去隱中條山與弟堦域友愛
甚常易衣而出年長不肯娶謂弟曰吾與若孤惻相
育既娶益疏吾不忍也嘗有倩喪欲省之不忍別遂

三人偕往而還值絕糧奴出求米奴醉仆于路怪其
久乃共負之歸醒而跪謝城曰寒而飲又何謝李泌
薦召為諫議大夫居數年猶未肯言及裴延齡傾陸
贄坐貶乃帥諸言官守延英門論延齡奸佞贄等無
罪宜召還會疏草為李繁所泄上大怒以為朋黨欲
罪之賴太子救得免上猶欲相延齡城以為儻相當
取白麻裂之也遷國子司業以匿太學生唐約故出
刺道州自署下考察察遣判官督賦行至州怪城不
出迎以問吏吏曰刺史自以有罪先就獄矣判官驚
立馳去其約已庇民如此元德秀陽城皆古今高行
然率不娶詭於中道至其一畝環堵易衣并日信其
志不遷於上儒者之難能也故不疑不論則元德秀
陽城有焉

徐積仲車從胡安定學使讀孝經以少失父輒流涕
父名石終身不御石器行遇石時怵然避之事母處

窮巷奉養隆備年逾壯未娶或勉之積曰娶非其人
恐為母憂廬墓之後逢晦冥風雨必哀伏號泣中屏
居里次蓬茅不掩而農父樵夫瞻仰若神明以近臣
薦授楚州教授每與學者言以治心養氣為先曰言
其所善行其所善思其所善如此而不為君子未之
有也言其不善行其不善思其不善如此而不為小
人未之有也侯可少個儻不羈己自改篤學多通視
貴勢藐如也與申頤為友易衣而出營力均所入以
給二家頗病徒步千里為求醫歸死矣目不瞑人曰
其侍侯君乎可撫之而瞑所代人營葬起人病者甚
多家無擔石顧樂善不倦如此後知化成縣革其頤
俗所為婚娶養送事甚具以韓魏公薦知涇陽鑿渠
溉田以勸學新民為任道雖未大行而
不疑不論不耽於利祿徐積侯可有焉

王樵淄川人咸平中昇丹游騎渡河家為停即棄妻
子挺身入界外訪父母累年不獲還山東刻木招魂

龔立祠祠事如生哀動行路又為家屬之殘於兵者
次第成服已望北太息曰身世如此欲自比於人可
乎遂論兵擊劍遊塞下一驢負裝徒步輒千里晚年
畫策于何承矩耿望求滅遼復讐不用乃於城隅累
磚自環謂之繭室病革掩戶卒其中范汝為豐縣人
靖康之難家沒于金思報讐上書陳邊事假武功大
夫奉國書遇完顏宗弼軍將殺之汝為曰死不足辭
然銜命出疆願一達國書死未晚乃解縛慰之命往
見劉豫拒不可已金又致之豫汝為見豫陳禍福勉
以忠義豫太息起立曰嗟乎君不見張邦昌乎使豫
即自新南歸人豈有直之者哉業至此復何言授同
知曹州固辭久之亡歸先是探金中機事輒蠟書聞
已金知蠟書事召捕之秦檜欲械送金乃棄官變姓
名為趙復徒步入蜀比檜死蜀中友人欲白其事汝
為慨然曰吾結髮讀書中遭亂思為君父復讐頗謬
為名公所知今老矣新貴人無知我者庸自理何為

王樵范汝為皆遭艱難未遑為祿仕也而秉直道瀕死不悔上答之不疑上不答不諂則王樵范汝為亦皆有

焉

馬仲弱冠登第崇寧中禁元祐學術程門宿學老生有叛去者仲自吏部求官西京法曹往依馬程願以非其時恐為累辭之仲執贄十往愈益恭且曰使仲得聞道死無憾況未必死乎且欲棄官而來先生歎曰能棄官則亦不須聞道也自是公暇雖風雨必造者三年同僚以飛語中之不顧也靖康之禍為書勸張邦昌極其懇切邦昌得書始定推戴之計高宗即位以城陷不能救主遷不能死自劾帝慰諭之因言黃潛善汪伯彥不法十七事貶監濮酒稅以襍被就道卒居常言溝壑喪元是人生本事又云有志行道者如為身名妻子則去道萬里矣陳師道無已熙寧中士習王氏學遂絕意進取元祐中以蘇軾傳堯俞

薦起為太學博士論者以非科目絀之調彭澤令不
赴家或斷炊妻子慍見不恤也時章惇在樞府因秦
觀招之以不傳贊不見王公為辭後以侍從交薦為
徐州教授還祕書正字從徽廟郊駢寒左丞趙挺之
畀孤裘衣之師道鄙不受卒凍死故如馬仲陳
師道者可謂上答之不疑上不答之不諂者矣
臣觀古今清約諸臣上皆喜其潔躬而下多疑其矯
物雖致用未宏而維風甚大聖門不以端木而絀原
思則儒效
可知矣

憂思章第十

儒有今人與居古人與稽今世行之後世以為稽適弗
逢世上弗援下弗推讒諂之民有比黨而危之者身可

危也而志不可奪也雖危起居竟信其志猶將不忘百姓之病也其憂思有如此者

弗逢世而猶憂世非儒者則不能也儒者以百姓為性以後世為命百姓危其起居後世墜其楷式則是儒者失其性命也故世有古今志無伸屈憂思與已而不為固憂思及人而不為佞異道之學全身避患則不能及此也人臣以是事其君故仁人志士著於世也

衛將軍文子問於子貢曰吾聞夫子之施教也先以詩書道以孝悌悅之以義而觀於禮成以文德蓋受教者七十有餘人孰為賢也子貢辭以不知文子曰吾子學焉何為不知也子貢對曰夫子之門人蓋三就焉賜有逮及有未及焉故不辨知文子曰吾子之所及請稽其行也子貢對曰夙興夜寐諷詩崇禮行

不貳過稱言不苟是顏淵之行也夫子說之以詩詩云媚茲一人應侯順德故逢有德之君世受顯命以御於天子顏淵有焉在貧如客使其臣如籍不遺恕不探怨不錄舊罪是冉雍之行也夫子曰是有土君子足以使衆也不畏強禦不侮矜寡其言曰性都其富任其戎是仲由之行也詩曰受小共大共為下國恂蒙何天之寵夫子欲以是文之也恭老恤孤不忘賓旅好學省物而不動是冉求之行也夫子語之曰好學則智恤孤則惠恭老則近禮其稱之也宜為國老志通而好文損相兩君之事其有禮節也是公西赤之行也夫子曰禮儀三百可能也威儀三千則難也二子欲學賓客之禮則於赤也滿而不滿實如虛過之如不及先生難之不學其貌竟其德敦其言於人無所不信其橋大人也常以皓皓是以肩壽是曾參之行也夫子曰孝德之始也弟德之序也信德之厚也忠德之正也參中矣四德者矣業功不伐貴

位不義不侮可侮不伐可伏不教無告是顛孫師之行也夫子曰其不伐則猶可能也其不弊百姓則仁也詩云豈弟君子民之父母學以深厲以斷送迎必敬上友下交銀手如斷是卜商之行也夫子曰詩云式夷式已無小人殆商也可謂不險也貴之不喜賤之不怒苟於民利矣廉於事上以佐其下是澹臺滅明之行也夫子曰獨富獨貴君子恥之夫人中之矣先成其慮及事而用之是故不忘是言偃之行也夫子曰欲能則學欲知則問欲善則訊欲給則豫偃也得之矣獨居思仁公言言義一日三復白圭是南宮縚之行也夫子信其仁以為異姓自見夫子入戶未嘗越屨往來過人不履影開蟄不殺方長不折執親之喪未嘗見齒是高柴之行也夫子曰高柴之執喪為難能也開蟄不殺則天道也方長不折則恕也恕則仁也湯敬以恕是以日躋此賜之所親睹也吾子有命賜則何足以知賢文子曰吾聞之也國有道則

賢人興焉中人用焉百姓歸焉若吾子之語審茂則一諸侯之相也猶未逢明君也子貢歸而述文子之問以質告孔子所然曰賜爾偉為知人子貢對曰賜焉能知人此賜所親睹也孔子曰吾語爾耳之所未聞目之所未睹者乎子貢負牆而聽孔子曰不克不忌不忿舊惡蓋伯夷叔齊之行也晉平公問於祁奚曰羊舌大夫晉之良大夫也其行何如祁奚對曰不知也公曰吾聞汝少長乎其所以蓋奄知之祁奚對曰其幼也恭而遜恥而不使其過宿也其為侯大夫也悉善則謙其端也其為公車尉也信而好直其功也其為和容也溫良而好禮博聞而時出其志也公曰嚮者以為弗知何也祁奚對曰每位改變未知所止是以不知蓋羊舌大夫之行也畏天而敬人服義而行信孝乎父而恭於兄好從善而數往蓋趙文子之行也其事君也不敢愛其死然亦不亡其身謀其身不遺其友君陳則進不陳則行而退蓋隨武子之行

也其為人之淵泉也多聞而難誣也不內辭足以沒世國有道其言足以生國無道其默足以容蓋桐提伯華之行也外寬而內直自設於隱括之中直已而不直人以善存亡汲汲蓋蘧伯玉之行也孝子慈幼允德秉義約貨去怨蓋柳下惠之行也其言曰君雖不量於臣臣不可以不量於其君是故君擇臣而使之臣擇君而事之有道順君無道橫命晏平仲之行也德恭而行信終日言不在尤之內在尤之外貧而樂也蓋芒萊子之行也易行以俟天命居下位而不懷其上觀於四方不忘其親苟思其親不盡其樂以不能學為已終身之憂蓋介山子推之行也君子之稽古者如此故今人與居古人與稽衛文子子貢有焉

趙文子與叔譽觀乎九原文子曰死者如可作也吾誰與歸叔譽曰其陽處父乎文子曰行并植於晉國

不沒其身其知不足稱也曰其舅犯乎文子曰見利
不顧其君其仁不足稱也我則隨武子乎利其君不
忘其舅謀其身不遺其友晉人謂文子於是乎知人
穆叔如晉范宣子郊迎問曰古之人有言死而不朽
何謂也穆叔未對宣子曰昔句之祖自虞為陶唐氏
在夏為御龍氏在商為豕韋氏在周為唐杜氏晉主
夏盟為范氏其是之謂乎穆叔曰以豹所聞此之謂
世祿非不朽也魯有先大夫曰臧文仲既沒其言立
其是之謂乎豹聞之太上立德其次立功其次立言
雖久不廢此之謂不朽若夫保姓受氏以守宗祊世
不絕祀無國無之祿之大者不可謂不朽穆叔之智
又不及叔譽矣以臧文仲之賢不及趙文子而高自
推許以陵大國宜其及矣雖然

文子穆叔則猶有稽古之餘焉

王烈彥方少師事陳仲弓敦義行著信於鄉里有盜
牛者主得之請曰刑戮自甘乞不使王彥方知烈聞

使遺布一端謝焉或問其故烈曰盜懼吾聞其過是有恥心既懷恥惡必能改過故以此激之後有父老遺劍於道一人見而守之至暮父老還尋得劍不告姓名而去迹之則前盜牛者也其為鄉里誦法如此其先有黃叔度憲年十四以成德著聞潁川荀淑至潁陽遇于逆旅殊然異之揖與語移日不能去謂叔度曰子吾之師表也既前至袁閎所未及勞問逆謂之曰子國有顏子寧識之乎閎曰見吾叔度耶是時同郡戴良才高倨傲而見叔度未嘗不正容及歸惘然如有失也其母問曰汝復從牛醫兒來耶對曰良不見叔度不自謂不及既睹其人則瞻之在前忽焉在後難得而測矣同郡陳蕃周舉常相謂曰旬日之間不見黃生則鄙吝之萌復存乎心及蕃為三公臨朝數曰若叔度在吾不敢先佩印綬矣故今世行之後世以為楷則黃憲王烈有焉

周惇頤之初在南安年甚少有因法不當死轉運使
王遠欲殺之惇頤爭不得出太息曰殺人媚人吾不
為也委告身欲去遠為感動得減死程珦時攝通守
見其氣貌異之排與語知其有得乃使二子受學焉
在桂陽郡守李初平禮重之問曰吾欲學則何如惇
頤曰公老無及矣然學固不專在書於是初平日咨
道要密詣有造而程氏兄弟學成德尊皆親炙面命
之力也邵雍初廬於百原山中學甚攻苦後見李之
才授以物理性命之學刻勵自進不知寒暑數年道
乃通出遊吳楚齊魯梁晉之間還歸洛陽潞鄭諸公
皆尊禮之程純公每見其書輒歎曰此內聖外王之
學也遠近學者從問經義日應不窮問與論天下事
雖究心世務者不及也司馬君實兄事之而純德篤
行俱為鄉校所宗鄉人每相戒曰毋為不善恐司馬
學士邵先生知也故今世行之後
世以為楷則周惇頤邵雍亦有焉

胡瑗翼之少讀書山中十年不歸得家問見署平安
字即投澗中不發也久之學成以范文正公聘主湖
州學一準古成德達材之教科條具備要以明體適
用為本使學者正遠有就頑傲有革也弟子往來常
數百人各以經轉授受行之數年東南之士大興於
禮樂後天子用大臣言建太學京師下湖州取瑗所
教士為之式及召為國子直講益拓前規於文章經
學兵農水利之事皆條別為諸生折衷禮部貢舉所
得士十常四五焉南渡後有陸賀者治蔬圃藥畦為
業力學躬行其家冠婚喪祭悉依洙水家禮行之子
六人各依所能為業而九齡九韶九淵並以學行聞
九齡所定家制以孝弟仁義忠信為本其子弟各以
六經語孟諸史分習共論不為科舉之業其家用以
田畝所入除租稅播種修葺廬舍之外以十分分之
留三分為水旱不測之需贏五年而外以給婚娶一
分為祭祀之用六分為十二月之用閏月則分為十

三月折三十日用其一務餘三分合月而計之以為
賓客餽送弔死問疾之需伏臘裘葛亦取於是九韶
又以訓誡之詞為韻語晨興率子弟謁先祠畢擊鼓
誦使列聽之是為金谿陸氏之學故今世行之後世
以為楷胡瑗
陸賀亦有焉

劉安世器之從司馬光學得无妄之旨力行之嘗論
章惇蔡確黃履邢恕以為四凶又言惇父在別籍異
財滅絕理義又論蔡確大不敬竄新州進諫議大夫
時宰有調停之說引鄧潤甫為翰林承旨安世言潤
甫出入王呂之門終始反覆今進用竇消長大闕力
爭之不報遂請祠惇修怨貶知南安軍徙新州又安
置英州同文館獄起蔡京乞誅滅安世家徙梅州惇
與京下猶不快擢一土豪為轉運判官必殺之判官
疾馳至梅守遣客來勸安世自為計安世巍然對客
如平時徐書數紙經紀同貶者家事付僕曰我死依

此行之夜半聞鐘聲僕驚起問則判官未至二十里
嘔血死矣安世方新睡如雷也劉妣好立為后惇卞
發安世司諫時及范祖禹諫乳媪事以為后發逮赴
獄會徽宗立而免還知鄆州京當國又七謫羈管峽
州後稍復承議郎卒蘇軾論當世人才必曰器之真
鐵漢云陳瓘瑩中紹聖初判明州章惇赴召聞其名
請與同泛瓘因問為政何先惇曰司馬光在邪所當
先辨瓘以乘舟譬之以為移勢偏重必失衆心章惇
色厲甚瓘從容應之勸以中道消朋黨惇頗納之至
都召為太學博士時蔡卞禁太學生不得為元祐學
術議毀資治通鑑瓘因策士引神考通鑑序為問以
是得不毀元符初為左司諫議論務持平不以細過
摘發惟論蔡卞章惇安惇耶恕之罪特力時蔡京為
翰林學士姦慝未著而瓘攻之益力曾布以給事中
餌之瓘為書置袖中面布直發其過布怒箕踞辭語
瓘色不變徐起曰所論國事是非自有定未可失待

士禮布為改容明日出知泰州蔡京用又竄廉州又以子正彙談蔡京動搖東宮事安置越州方瓘之初在諫垣也以神宗實錄皆紹聖史官據安石所修目錄變亂是非不可傳後乃為尊堯錄闕之京卞患其書行欲焚廢乃推石慊知台州慊視事之明日即遣校攝瓘陳獄具懼之瓘色不動厲聲曰今日之事豈被制旨耶慊失措曰有尚書省劄子請出示則取尊堯集綴中毀棄耳瓘曰若是則何爾且君知尊堯之所立名乎以神考為堯主上為舜何為詆誣時相寡學術悖而為此君所得幾何乃不畏公議犯名教乎慊大慙無以應卒不能奪也故諂諂之民比黨危身身可危志不可奪則劉安世陳瓘實有焉胡安國康侯初為太學錄蔡京以同鄉欲牢籠之不得會舉遺逸安國舉布衣王繪鄧璋於是使吏訟二人皆范純仁門客流人鄒浩為請託坐除名靖康初除太常少卿趣召對上甚嚮信而耿南仲訾短之會

中丞許翰見上問曰卿識胡安國未對曰未也然臣知其人自蔡京當國二十年天下士大夫無不受其籠絡超然遠跡惟安國一人帝喜除中書舍人既入為何桌馮鄉所擢出知通州而金陷京師建炎初以給事中召入為黃潛善所尼既而天子益聞其名召除侍讀修春秋傳又為呂頤浩秦檜所惡排擊去而春秋傳卒行於世真德秀景元嘉定初為起居舍人時史彌遠方以爵祿縻天下士德秀慨然謂劉燾曰吾徒頃並去使廟堂之上亦知世有不肯為從官之人出為江東轉運副使都司胡槻薛振以德秀迂儒試之事必敗而德秀治荒政發廩全活譽日起又以好名論之左遷歷泉州興隆潭州所在著聲理宗初以直學士召屢進諫言又為史彌遠所格張言者莫澤梁成大勅之落職奉祠久之彌遠死乃召參大政以大學衍義讀書記行於世故雖危起居竟伸其志胡安國真德秀有焉

張九成子韶充經筵官講論甚有開發會議和九成以禮部侍郎陳十事以操之秦檜謂曰公幸成檜此事對曰九成豈敢異議顧朝廷不可苟安耳檜曰立朝須優游委曲九成曰未有枉已而能直人者也於是檜目為趙鼎黨深間之九成入見上曰外議以臣為趙鼎黨即臣亦自疑上問故九成曰臣每見鼎聽其議論正直無滯坐不覺為久帝以語檜檜曰自古朋黨皆畏人知此人獨無畏坐罷奉祠尋以謗訕安置南安帝終念之嘗曰張九成安在檜曰頃以異議惑衆罷去此人終不為陛下用帝曰九成清貧不可無祿檜死乃復官當檜未死時新入高閣為司業帝幸太學講秦卦畢又問九成安在高閣以奉祠對秦檜亦疑其薦引斥逐之寶慶初九成乃以明道議爵諡云蔡元定季通與朱元晦游學禁作編管道州元定方宿元晦所聞之笑謂學者曰化性起偽烏得無罪不辭家就道諸友餞別蕭寺生中有泣下者元定咨

疑質是雍如也衆謂行宜緩自愛元定曰獲罪於天可逃乎杖屨與子沈行三千里脚為流血無幾微見顏色至春陵遠近來學者日衆或勸之謝生徒元定曰彼以學來何忍拒之誠有禍患亦非閉門塞竇所能免也卒以圖書愿律時範著於世故雖危起居竟伸其志張九成蔡元定亦皆有焉

范鎮景仁直諫院常引大體不以細過繩人論相執中無學術至執中家妾殺婢置之不論也以上春秋高儲嗣未立勸上拔近屬以繫人心執政有難色鎮曰事當論是非不論難易如謂今日難於前日安知異日不難於今日乎凡見上流涕面陳者三章十九上待命百餘日鬚髮盡白也後定策立嗣實鎮首發之既自陳州召還為翰林學士知銀臺司數封還詔制與王安石忤上疏自劾極論安石用人之繆又言陛下有納諫之資大臣進拒諫之計陛下有愛民之性大臣用殘民之術疏入安石怒持其章為手顫自

草制極詆之落翰林學士悉奪所得恩鎮表謝略曰
願陛下集羣議為耳目以除壅蔽之奸任老成為腹
心以養和平之福天下聞而壯之蘇軾往賀曰公身
雖退名益重矣鎮愀然曰君子言聽計從消患於未
萌使天下陰受其賜無智名無勇功上也天下被其
害而吾享其名獨何心哉呂誨獻可為殿中侍御史
數論列大臣然未嘗暴揚人曖昧王安石甫執政士
大夫多慶得人誨獨策其必禍天下疏論之道達司
馬光問今日所言何事誨曰袖中彈文乃新參也光
愕然曰衆喜得人奈何論之誨曰君實亦為是言耶
安石雖有時名然好執偏見輕信奸回喜人佞已聽
其言則美施於用則疎置諸宰輔天下行受其禍光
以未有顯跡勸置之不可誨乃論安石大奸似忠大
詐似信合王行盧杞為一人由是斥外而安石果以
忠雖敗光由是服誨之先見及誨病乞致仕猶懇懇
以醫者用術詐方為諷卧病已劇光往候之諄諄言

天下國家事目且賔矣光呼之曰更有以見屬乎誨復張目曰天下事尚可為君實勉之故如范鎮呂誨者則可謂不忘百姓之病者矣

魏徵問於文中子曰聖人有憂乎子曰天下皆憂吾得不憂乎問疑曰天下皆疑吾得不疑乎徵退謂董常曰樂天知命吾何憂窮理盡性吾何疑故如王通者可謂憂思者矣

臣觀憂思諸儒不為利祿不為身家常存百姓之病下既嫌其激厲上又惡其沽名則比黨而危之者至矣是亦儒者之窮也

寬裕章第十一

儒有博學而不窮篤行而不倦幽居而不淫上通而不

困禮之以和為貴忠信之美優游之法慕賢而容衆毀方而瓦合其寬裕有如此者

敬者所以為直也義者所以為方也敬義立而德不孤不孤則可以大故和者所以為大也易曰直方大不習無不利則不疑其所行也學出於和行出於和通入於和困入於和儒有百行和一而已和非仁人則不能用也君子養中以致和博以居之篤以行之故剛毅特立豫備憂思而不犯衆之所忌以為寬裕之至也人君以是取其臣是保傳公孤之任也

張安世張湯子也少以父任為郎用善書給事尚書精力於職休沐未嘗出嘗亡書三篋詔問莫能知惟安世識之後得書相較無遺失因擢為尚書令昭帝即位霍公秉政上心憚之以安世篤行內倚為重

欽定四庫全書

卷下

御史大夫魏相言安世事武皇三十年忠信謹厚勤勞政事夙夜不怠與大將軍定策天下重臣也今新失大將軍請尊安世為大將軍報光祿勳專念天下母久空大位塞尊權帝欲從之事頗聞安世中自懼請間免冠頓首曰老臣耳妄聞言之為先事不言情不違誠自量不足以居大位繼大將軍惟上裁察全老臣之命上笑曰君言太諫君而不可誰當可者安世深解不能得竟拜大司馬衛將軍領尚書事自霍氏柄國丞相獨擁虛位為天下所指目安世念欲為天子重相權以謹密自周每定大政已決輒移病出聞有詔令乃驚使吏之丞相府問焉自朝廷大臣不知其與議也故如張安世者可謂博學不窮篤行不倦幽居不淫上通而不困者矣

韋玄成韋賢子也玄成既辭爵不得乃襲封宣帝高其誼以為河南太守稍遷太常坐與楊惲厚免官及

以列侯侍祀孝惠廟天雨淅不駕駟馬車而騎有司
勅奏削為關內侯然立成素謙遜好學不自尊貴遇
知識步行下從者載送以為常既自傷貶黜父爵作詩甚
刻厲後以淮陽中尉寢嚮用永光中代于定國為丞
相復封故國又作詩自著復玷缺之難難以戒示子
孫漢興稱詩足繼三百篇則諫鄒赫矣於肅四篇為
盛焉當永光時七廟數滿而郡國所立宗廟不稱經
義乃議罷郡國廟及五廟四親之文又除衣冠出遊
遵非適不配之制史稱其守正持重不及父賢而文
采過之要如立成辭爵恪慎謙抑自將不十年遂復
父位以經學名世未為不守正持重也
故博學篤行不淫不困韋立成亦有焉
王吉子陽好學明經舉孝廉為昌邑中尉昌邑王好
游獵動止亡節吉屢疏諫之王賀雖不遵道猶知敬
禮吉及昭帝崩霍光迎立吉人為書戒王稱高宗諒
陰三年不言大王以喪事徵宜日夜哭泣悲哀慎勿

有發且勸王垂拱南面以政事委大將軍王既即位以注亂廢昌邑羣臣皆下獄誅惟吉與郎中令龔遂得減死為城旦稍起為博士諫大夫時宣帝親政事頗尚綜覈吉上書言期會簿書斷獄聽訟非太平之基勸上與公卿大臣宜一歸之於禮又言世俗婚娶太早尚主有違古義俗吏得任子弟非制尚方侈靡宜示天下以儉上以其言迂闊不甚寵異也吉遂謝病歸吉少時游學長安東鄰有栗樹垂庭中吉婦取栗啖之吉遂去婦鄰人知欲伐樹因固請吉還婦里中語曰東家有樹王陽婦去東家栗完去婦復還其勵志如此故博學篤行

不淫不困王吉亦有焉

張湛子孝矜嚴好禮動止有常則居幽室必修容遇妻孥如嚴賓在鄉黨詳言正色三輔以為儀表或議其詐湛笑曰詐善不亦善乎建武初為左馮翊修典禮設條教化大行予告歸平陵望寺門而步主簿

進曰明府尊重不宜自輕湛曰禮下公門式路馬孔子於鄉黨恂恂如也父母之國當盡禮豈謂自輕哉拜光祿勳陳諫盡規多所匡益帝臨朝少有脩容軌獻傲湛常乘白馬帝每見湛輒言白馬生且復諫矣及郭后廢乃稱疾不朝及大司徒戴涉誅起為大司徒自陳病篤遺洩朝堂免湛與伏湛皆名儒嘗事新室光武祕濯用之能自慙以顯故博學篤行不淫不困則張湛有焉

卓茂子康為密令民嘗有言亭長受其米肉遺者茂曰亭長為從爾求乎為爾有事囑之而受乎抑平居自以恩意賂之乎民曰往遺之耳茂曰遺之而受又何言民曰賢明之君使民不畏吏吏不取民今我畏之吏又取之故言耳茂曰爾為敝民矣凡人生所羣居不亂異於鳥獸者謂有禮義相敬事耳吏但不當強求何遽不宜受遺也民曰苟如此律何故禁之茂笑曰律設大法禮順人情今吾以禮教汝汝必無怨

惡以律治汝汝何所措手足乎一門之內小者可論
大者可殺也且歸念之魏霸喬卿濟陰人世有禮義
少喪親兄弟同居州里慕其雍和和帝時為鉅鹿太
守掾吏有罪先之訓誨不改者乃罷免吏或相譖訴
輒稱其他事之長以覆之譖訴遂息徵拜將作大匠
時作順陵盛冬地凍中使督促數罰縣史以勵霸霸
但勞來之曰天氣冱寒諸卿被辱皆大匠過也史皆
懷恩力作加倍故禮之貴和卓茂魏霸嘗用之矣

楊津北魏弘農人家世純厚兄弟八人並敦義讓至
老津已六十有兄播椿相友愛不衰津事播如父及
播卒椿與津並登台司而津旦暮參問羣子姪羅列
階下椿不命坐津不敢坐椿近出不至津踰日是還
乃共食食則津親授匕箸先嘗椿命食乃食已津出
刺泗州椿在京邸四時嘉味因使附寄未寄不先入
口椿得所寄輒對之泣下一家之內男女百口總麻
同爨庭無間言椿垂老戒子孫曰國初好服綵色吾

及見清河公恒布衣韋帶約勒諸父不與產求利不
與勢家為婚至吾兄弟不能違令汝等服乘漸於華
好此吾等不如上也吾兄弟家居不忍別食不異
分財間汝等頗有別齋獨食者此又不如吾世一等
也太和初吾兄弟三人並奉二聖近臣居母子間相
戒深慎侍禁中十餘年未嘗一言人過太后時焦貴
問之對曰臣等不敢以不審之言仰誤聖聽其後高
祖謂諸貴曰太后時吾每得杖撻由左右言是非者
多惟楊播兄弟和吾母子真純臣也今聞汝等學時
俗輒論人過見貴勝敬重見微賤易忽此人行之大
失也故如楊津兄弟
可謂以和為禮者矣

江州陳氏者陳宜都王之後有伯宣者好學子崇為
江州長史建家塾教子弟唐末旌為義門至宋初既
十有三世矣長幼七百口每食必羣坐廣席未成人
者別食少事長卑事尊不蓄婢僕供作使上下親睦

家蓄犬百餘一犬不至羣犬為不食鄉里率化爭訟
狝少宋初免其家徭後屬歲饑乏食知州唐戩為請
歲貸粟二千石及後有陳旭者主家自白言今歲受
貸粟之半可及秋遂止受半貸或云歲歉粟貴金受
而難可得贏餘旭曰朝廷以旭家羣從千口故貸以
公粟豈因為利乎故如陳旭者可以語禮矣禮而後
和而後禮可立也

高允伯恭好文學忠信不欺崔浩之勒國史也魏主
怒其暴國惡將行重誅太子左右之語允但委罪於
浩允固不可魏主召問曰國書皆浩所為乎對曰太
祖記前著作郎劉淵所為先帝記及今記臣與浩共
為之然浩總裁而已至於著述臣多於浩魏主謂太
子曰允罪重於浩何以得生太子懼以迷亂為請魏
主再問之允以質對且曰太子欲生臣臣實不迷亂
魏主默然久之頓太子曰此人情所難臨死不易辭

信也為臣不欺君貞也詔特原之已命允為詔誅浩
及僚屬僮吏百二十人皆族允持不上趣之急允又
請對曰浩所坐更有他釁非臣敢知如直以觸犯罪
不至死魏主恕命介士執允并戮之太子為且拜且
請乃獲免亦僅族浩餘誅止其身游雅曰喜怒者人
生所不能無也子與高子游處四十年未嘗見其喜
怒之色崔司徒嘗謂高生豐才博學所乏者矯矯風
節耳及司徒得譴詔旨切責聲嘶股戰不能措一辭
高子敷陳事理中釋是非辭義清辨非謂矯矯者乎
文宗愛任勢威震四海王公以下望庭介拜高子獨
升階長揖誰風節如之故如高允者則可謂忠信之
美優游之法者矣當時齊有崔退者耶邵每道其短
退每道其長名位相
近而高子深遠矣

許衡平仲少時避亂暑中過河陽道旁有梨衆取啖
之衡危坐不動或問之曰非其有而取之非義也人

曰世亂無主衡曰梨無主吾心無主乎自是博覽經傳下及百家靡不研究久之從姚樞處得程朱書讀之有契遂移家蘇門從姚樞居取前所得簡帙悉焚之與子書曰小學四書吾敬之若神明信之若師休能明此書他書雖不治可也後以姚樞薦召提京兆學風化大行世祖即位召拜國子祭酒謝病歸至元二年復召至命議事書省四年復請歸五年復召定官制時阿哈瑪特搜權橫放大臣阿附之衡正色不懾會命其子簽書密院事衡曰國家事權兵民財三者而已今其父典民與財子又典兵可乎上曰卿慮阿哈瑪特反耶衡曰由其道亦可以反耳因論其專權周上蠹政害民諸事又謝病歸八年以集賢殿大學士召守國子監祭酒衡喜曰此吾事也時所選子弟皆幼穉衡設誠教之課誦稍暇即習禮習射投壺書算嘗云教人與用人異用人當用所長教人當教所短由是學者日改月化程朱之學明於北方許衡之

力也。許衡仕進在夷惠之間，然其志在明道。淑人故忠信之美，優游之法，衡亦有焉。

公孫弘，淄川人，少為獄吏，罪免，牧豕海上四十餘年。乃學春秋，雜說六十，以賢良徵為博士，使匈奴還，報不。合上怒，以為不能移病免歸。元光間，復徵賢良文學，國人固推之，對策太常，奏居下。天子擢為舉首，容貌甚麗，又高自況，譬至云：周公旦治天下，春年而爽三年，而化五年，而定。惟陛下所志，天子至問弘，自視孰與周公賢？弘云：據曲木者不累，日銷金石者不累。月人性不相遠，恭年而變。臣弘尚竊遲之上，異其言。時方通西南夷，巴蜀苦之，使弘視焉。還，盛毀其無用上，不聽。每朝，會議開陳其端，使上自擇，不肯面折廷諍。諍上察其行，慎厚，辨論有餘，習文法吏事，緣飾以經術，甚悅之。一歲中，至左內史。嘗與公卿約議，至上前，皆背約以順上旨。弘黯廷詰其懷，詐不忠，弘謝曰：「知臣者以臣為忠，不知臣者以臣為不忠，上然其言，弘知。」

為人談笑多聞常稱為人主病不廣大為人臣病不
節儉時又東置滄海北築朔方弘數諫以為罷黜中
國以奉無用之地使朱買臣難置朔方之使發十策
弘不得一乃謝曰臣山東鄙人不知其便願罷滄海
西南夷專事朔方汲黯一日詰弘曰弘位在三公而
布被此詐也弘謝曰有之管仲相齊有三歸侈擬於
君桓公亦霸晏嬰相齊食不重肉下比於民齊國亦
治臣患未能比於晏嬰耳且無黯陛下安聞此言上
愈益賢之於是代薛澤為丞相封平津侯弘自見為
舉首起徒步數年至丞相封侯於是起客館開東閣
以延賢人身食一肉飯脫粟俸入以給故人賓客及
後數傳東閣客館皆為馬廄車庫矣故慕賢而容衆
毀方而瓦合
公孫弘有馬

匡衡稚圭父世農夫至衡好學精力絕人傭作以供
資用射策不應補平原文學東海人共追宗之蕭望

之梁丘賀已貴皆從衡問詩元帝為皇太子聞衡說
大善之及即位以史高薦召為郎中問政治得失衡
言朝有變色之言則下有爭鬪之患上有自專之主
則下有不諫之臣上有克勝之佐則下有傷害之心
上有好利之臣則下有盜竊之民其大意歸於禮讓
上悅其言遷光祿大夫太子少傅時帝好文詞頗改
宣帝之政而優游寬容進用很多又傳昭儀及子定
陶王愛幸衡乃言先帝制度未可變更宜遵制揚功
以定羣下之心又言審好惡理性情可畢王道聖王
必慎妃后之際別適長之位慎防其端禁於未然皆
關切時務上以為任公卿遷光祿勳御史大夫已代
韋玄成為丞相封樂安侯成帝即位上疏戒妃匹勸
經學言關雎為王化之原六經者聖人所以統天地
之心語尤精粹中於時事上敬納其言既與御史大
夫甄譚共奏石顯舊惡並諸黨與司隸校尉王尊劾
衡譚居大位知顯等專擅不以時白發而阿諛曲從

反歸過先帝罪至不道有詔勿劾衡以此屢謝病乞骸骨卒以封田越界事廢免衡之毀方未有若張禹孔光之甚也然於石顯用事時實不能匡救於早故慕賢而容衆毀方而瓦合匡衡亦有焉

狄仁傑懷英則天時已為同平章事既與任知古裴行本等同被告密下來俊臣治先是俊臣請勅一問即承者得減死俊臣以是誘之仁傑即署狀曰大周革命萬物維新唐室舊臣止欠一死反是實俊臣乃少寬之仁傑得裂帛潛書冤狀遣子告變太后意動乃召見仁傑等問曰承反何也對曰脫不承已死於考掠矣曰何為作謝死表對曰無之出表乃知其詐由是得釋久之后以誅殺多稍厭李昭德金安藏等亦時有異心之言后又高年稍尊信仁傑仁傑乃從容以姑姪母子啓諭后又時與張昌宗兄弟周旋勸召還太子一日后召廬陵王還匿之帳中召仁傑語上事仁傑語益切至涕下不自禁后乃出王見之曰

還爾太子仁傑起再拜賀且曰太子歸外未有知者
人言紛紛何所信后乃令太子舍濯龍門負儀仗迎
復宮中外大悅武承嗣怏怏病死先是后問將相之
才於仁傑仁傑薦張柬之及仁傑薨柬之卒誅二張
復中宗之位仁傑委蛇晨牝之際不能潔身忍辱多
而見功晚然其事機難為道不宜遽故慕賢而容衆
毀方而瓦合

狄仁傑有焉

王旦子明景德中參知政事時拜母信急上駕幸澶
州留守雍王遇暴疾乃留旦居守旦對上曰願宣寇
準至臣有所請準至旦曰十日間未有捷報也當如
何帝默然良久曰立皇太子旦頓首幸甚馳抵京不
過家即宿直禁庭以王命參決中外莫知其為旦也
至駕還郊迎乃知之他所處契丹丐幣德明求糧皆
中於廟算及薦達朝士咸莫之知也李行簡以將作
丞家居遷太子中允使者不知其宅上命就中書問

之乃知為旦所薦曹瑋自秦州還命李及代衆疑違其才旦獨以為可用之果效時寇準已家居旦薦之復召知樞密時談旦短上語旦曰卿常稱準美準常談卿過何也旦曰理固當然臣當路久缺失必多準對陛下無所隱益見其賢及準罷遣人從旦求使相旦驚曰將相之任豈可求耶準大憾之已而除準同平章事武勝軍節使準見上謝帝具道旦所以薦者準始愧歎以為不如也凡旦前後薦可為大臣者十餘人惟李及凌策不至相位及旦病篤問可付後事者旦曰知臣莫若君再三問乃強舉笏曰莫如寇準故慕賢而容衆毀方而瓦合王旦亦有焉旦以天書封禪事恒怏怏自慊從諛也遺命為緇流以斂亦可謂毀方瓦合者矣

臣觀寬裕諸臣皆盛豫之器上下所喜必本於博學篤行不淫不困則是可儒也

舉賢章第十二

儒有內稱不辟親外舉不辟怨程功積事推賢而進達
之不望其報君得其志苟利國家不求富貴其舉賢援
能有如此者

君子遺其親而後可事其君遺其家而後可謀其國
謂營身而可以事君營家而可以謀國吾不信也大
臣自為富貴則賢能之人不用賢能之人不用則士
失其報君失其志朝多貪鄙而事功並墜矣人君以
是取臣則賢路不塞高位
不濫禮讓興而權賄止也

楚令尹虞丘子復於莊王曰臣聞奉公行法可以得
榮能淺行薄無望上位才之所不著無當其處臣為

令尹十年矣國不加治獄訟不息處士不升久踐高位妨羣賢路臣之罪當稽於理臣竊選國俊下里之士曰孫叔敖秀羸多能其性無欲君舉而授之政則國可使治民可使附莊王曰子輔寡人寡人得以長於中國今行於絕域今何求焉虞丘子曰久固祿位者貪也不進賢達能者誣也不讓以位者不廉也有三者則不忠不忠則無以事君莊王從之賜虞丘子采地三百號曰國老以叔敖為令尹少馬虞丘子家干法孫叔敖執而戮之虞丘子入見於王曰孫叔敖之果可使也奉國法而不黨施刑戮而不戢可謂公矣莊王曰是夫子之賜也故如虞丘子可稱曰儒矣

楚莊王聽朝罷晏樊姬下堂而迎之曰王得無餓倦乎莊王曰飽於聽忠賢之言也樊姬曰王之所謂忠賢諸侯之客歟抑中國之士歟王曰沈令尹也樊姬掩口而笑王曰何也姬曰妾付於王尚湯沐執巾櫛

振衽席十有一年矣然妾未嘗不遣人之梁鄭之間求美人而進之王也與妾同列者十人賢於妾者二人妾豈不欲擅王之寵哉不敢以私願蔽衆美欲王之多見則娛今令尹相楚數年矣未嘗見進賢而退不肖也又焉得為忠賢乎莊王旦朝以樊姬之言告沈令尹令尹避席而進孫叔敖叔敖治楚三年而楚國霸楚史載之曰楚之霸樊姬之力也故如樊姬賢於虞丘矣

秦穆公微鹽於虞人虞人以百里奚將車公觀鹽牛車之下見其牛肥問百里奚曰任重致遠而牛何肥也對曰臣飲食以時使之不以暴有險先後之以身是以肥也穆公知其君子也令有司沐浴為衣冠與坐問所以肥國者公大悅異日見公孫支公孫支曰君其得聖人乎君之聰明思慮類得聖人也公曰然吾見百里奚類聖人也公孫支歸見百里奚取雁以賀曰君得社稷之臣敢賀社稷之福公不辭再拜而

受明日公孫支乃致上卿以讓百里奚公不許公孫
支曰君不用賓相而得社稷之臣君之祿也臣見賢
而讓之臣之祿也今君既得其祿矣而使臣失祿可
乎請終致之公不許公孫支曰臣不肖而處上位是
君失倫也進賢退不肖君之明也終處高位廢君之
德安上失倫進臣之行臣請逃公乃受之以百里奚
為上卿而公孫支副之故

如公孫支可謂儒者矣

齊將軍田贖出將張生往送之告曰昔者堯讓許繇
天下洗耳而不受將軍知之乎曰唯然知之伯夷叔
齊辭諸侯而不為將軍知之乎曰唯然知之於陵仲
子辭三公而為人灌園將軍知之乎曰唯然知之知
過去君弟變姓名為庶人將軍知之乎曰唯然知之
孫叔敖三去相而不悔將軍知之乎曰唯然知之此
五大夫者而在則不送將軍矣今將軍合一國之權
提師十萬擅斧鉞之權慎毋以所知傲所不知者也

田疇曰唯受教矣夫是則猶未及於舉士也而舉士之意其焉推其意也可以不辟

趙宣子言韓獻子於晉侯曰其為人黨治衆不亂臨死不恐晉侯以為中軍尉河曲之役趙宣子之車千行獻子戮其僕人皆曰韓獻子不終矣其主朝升之而暮戮其僕誰能待之役罷趙宣子觴大夫爵三行曰二三子可以賀我二三子曰不知所賀宣子曰我言韓厥於君言之而不當必受其刑今吾事失次而戮之僕可謂不黨矣是吾言當也二三子再拜曰夫子之言不惟晉國賴之唐叔實享之其先有祁大夫請老問嗣焉稱解狐其讐也將立之而卒又問對曰午也可於是羊舌職死矣晉侯曰孰可代對曰赤也可於是使祁午為中軍尉羊舌赤佐之君子謂祁奚能舉善矣稱其讐不為諂立其子不為比舉其偏不為黨其先有舅犯者文公問舅犯曰誰可使為西河守者舅犯曰虞子羔可也公曰非汝之讐耶對曰

君問可為守者非問臣之讐也蓋見舅犯而謝之曰幸赦臣之過又薦之於朝舅犯曰薦子者公也怨之者私也吾不以私事害公義子去矣顧吾射子也故趙宣子之學於祁奚猶祁奚之學於舅犯也內舉不辟親外舉不辟讐則三大夫皆有焉

管仲言於齊桓公曰夫墾田創邑闢土植穀盡地利則臣不如甯戚請置以為田官登降揖讓進退閑習臣不如隰朋請置以為大行蚤入晏出犯君顏色進諫必忠不重富貴不避死亡則臣不如東郭牙請置以為諫臣決獄折中不誣無罪不虐無辜則臣不如弦寧請置以為大理平原廣囿車不結軌士不旋踵鼓之而三軍之士視死若歸則臣不如王子成甫請置以為大司馬君如欲治國強兵則五子者在矣如欲霸王則夷吾在此故程功積事推賢而進則管夷吾有焉

田忌去齊奔楚楚王郊迎至舍問曰楚萬乘之國齊亦萬乘之國也常欲相并奈何對曰易知耳齊使中驩將則楚發五萬人使上將軍將之至鹹首而反耳齊使田居將則楚發二十萬人使上將軍將之分別而相去也齊使盼子將則楚發四封之內王自出將而忌從相國上將軍為左右司馬如是則王僅得全耳於是齊使申驩將楚發五萬人上將軍至擒馘而反於是齊王忿然更使盼子至楚悉出四封之內王自出將田忌從相國上將軍為左右司馬益王屬車九乘僅得免耳至舍王北面正領齊祛問曰先生何知之審也田忌曰此易知耳申驩為人侮賢者而輕不肖俱不為用是以亡也田居為人尊賢者而賤不肖賢者負任不肖者退是以分別而相去也盼子之為人也尊賢者而愛不肖俱負任是以王僅得全耳田忌之言則未至於推賢也然以一將之賢絀萬乘之敵故萬乘之富不如一士之貴也

子路問於孔子曰治國何如孔子曰在於尊賢而賤不肖子路曰范中行氏尊賢而賤不肖其亡何也曰范中行氏尊賢而不能用也賤不肖而不能去也賢者知其不已用而怨之不肖者知其賤已而讐之賢者怨之不肖者讐之怨讐並前雖欲無亡得乎君子推賢不營報施不解讐怨曰利於君國而為之雖如田忌之言未逮於道也孔子閒居喟然而歎曰銅鞮伯華而無死天下其有定矣子路曰願聞其為人也有道而能以人子路曰其壯也有勇而不屈其老其壯也有勇而不屈則可夫有勇又誰下哉孔子曰由也不知吾聞之以衆攻寡無不消也以貴下賤無不得也周公制天下之政而下士七十人豈無道哉不能下士則不能推賢不能推賢則君子畔棄而小人慢亂介之推行年十五而相荆仲尼聞之使人往視還曰廊下有二十五俊士堂上有二十五老人仲

尼曰合二十五人之智智於神合二十五人之力力於彭祖以相萬乘其免已乎故推賢而進達銅鞮伯華介之推有焉

楚令尹辛景公謂成公乾曰令尹將安歸成公乾曰殆於屈春乎景公怒曰吾資何少於屈春乎成公乾曰義獲天下之至憂也而子以為友鳴鶴芻狗其知甚少而子玩之鵩夷子皮日侍於屈春損頰為友二人者智足以為令尹不敢專其智而委之屈春故曰其歸之屈春乎魏文侯將置相置於季成子與翟黃翟黃謂李克曰君問相於先生誰屬者李克曰其季成子乎翟黃不悅李克曰君問相於我對曰君視之矣貴視其所舉富視其所與窮視其所不為貧視其所不取君曰先生出矣寡人之相定矣以是知其為季成子也翟黃曰觸之所舉多矣昔者西河無守吾舉吳起鄴無令吾舉西門豹酸棗不治吾舉北門可王

欲攻中山吾舉樂羊王欲使治之臣吾舉先生欲傅太子吾舉屈侯附觸何負於季成子李克曰季成子食祿千鍾什九居外是以求得卜子夏曰子方段干木三人者君皆師之子之所舉皆臣之耳於是翟黃自愧失對他日見段干木道其故段干木曰進賢之難也子之六舉者皆賢季子為相子終其次也夫季克之言則猶有未盡也季子之進賢也不望報而翟黃望報也

齊威王游於瑤臺成侯卿來車從世都王望之謂左右曰國至貧也何出之盛也左右曰與人者有以責之受人者有以易之王試問其說俄而成侯卿至謁曰忌也來王不應如是者三王徐曰以國之貧也何出之盛也成侯曰死罪幸赦之得言其說是忌之舉賢也是王之用人也昔者忌舉田居子為西河而秦梁弱舉田解子為南城而楚人抱綺羅而朝舉黔涿子為冥州而燕人給牲趙人給盛舉田種首為即墨

而於齊足究舉刁勃子為大士而民益富九族益親
舉此數良人者王安枕卧耳何患貧哉夫成侯卿之
舉賢則為富貴也晏子則不為富貴者也晏子與高
繚遊十餘年景公欲從而見之晏子曰臣聞為地戰
者不能成王為祿仕者不能成政高繚與嬰為兄弟
久矣未嘗干嬰之過補嬰之闕特仕進之臣何足以
補君晏子之言是矣不為望報不為
富貴而惜乎晏子之未有所舉也

晏子之晉見披裘負芻息於途者以為君子也使人
問之曰是越石甫也齊人累之晏子曰噫解左驂贖
之載與歸不辭而入越石甫請絕馬晏子使人應之
曰嬰未得交也而免子於患猶為罪乎越石甫曰吾
聞士絀於不知已而伸於知己者歸而不辭是以請
絕也晏子乃出謝之曰向也見客之容今也見客之
意嬰聞察實者不留聲觀行者不幾辭嬰可以辭而
無棄乎以是尊之以為上客夫以為人才不及晏子

耳何晏子之末有所舉也淳于髡侍于宣王與之論
好曰古者好焉王亦好焉古者好味王亦好味古者
好色王亦好色古者好士王獨不好士宣王曰國無
士耳有則寡人亦好之矣淳于髡曰古者驩騶騶驥
今無有王選於衆亦好味矣古者有毛廩西施今無有王選
於衆亦好色矣王必待堯舜禹湯之士而後好之則
禹湯之士亦不好王矣故晏子猶未有與於推賢也
孔子謂宓子賤曰子治單父而衆說語我所以治之
者曰不齊父其父子其子恤諸孤而哀喪紀孔子曰
善小節也小民附矣猶未足也曰不齊所父事者三
人所兄事者五人所友者十一人孔子曰父事三人
可以教孝矣兄事五人可以教弟矣友十一人可以
教學矣中節也中民附矣猶未足也曰此地有賢於
不齊者五人不齊事之教不齊所以教之術孔子曰
欲其大者乃在於此矣昔者堯舜清微其身以觀聽

天下務來賢人夫衆賢者百福之宗也神明之主也
不齊之所治者小也不齊之所治者大其與堯舜繼
矣夫子賤亦未嘗推賢而達之也然其道有大於推
賢者曰有利於國家晉平公問於叔向曰昔者齊桓
公九合諸侯一匡天下不識其君之力乎其臣之力
乎叔向對曰管仲善制割隰朋善削縫賓胥無善純
緣桓公知衣而已亦其臣之力也師曠侍曰臣請譬
之以五味管仲善斷割隰朋善煎熬賓胥無善齊和
羹以熟矣奉而進之而君不御誰能強之亦君之力
也夫管仲諸賢則猶求富貴也然其道有進於富貴
曰使君
得其志

趙烈侯好音謂相國公仲連曰寡人有愛可以貴之
乎相連曰富之則可貴之則否烈侯曰然有鄭歌者
槍石二人可與之田萬畝居久不與烈侯又命與之
相連未有以易也番吾君謂相連曰君實好善而未知

欽定四庫全書

卷下

所持今公相趙四年亦有所進士乎曰未也番吾君
曰牛畜荀欣徐越此三人者皆足以移君所好矣相
連乃進是三人者明日牛畜侍道以仁義約以王道
明日荀欣侍教以選練任官使能明日徐越侍教以
節財儉用察度功德使國無不克烈侯乃謂相國曰
歌者之田且止矣益其祿以官三人故如相連可謂
使君得志不求富貴者矣

晉文公田於號遇一叟問焉曰號之為號久矣子處
此聞號亡其有說乎叟對曰號君斷則不能諫則無
與也不能斷又自謂賢是以亡也文公報田歸遇趙
衰而告之趙衰曰其人安在公曰未與之來也趙衰
仰首而歎曰哀哉古之君子聽其言則用其人今之
君子聽其言則棄其身故晉國之推賢者莫如趙衰
也或論趙衰與舅犯之賢也有士欲達於文公因舅
犯終歲不達因趙衰三日而達之故晉國之推賢者

莫如趙衰也晉平公過九原而歎曰嗟乎此地之蘊
吾良臣多矣若使死者起也吾誰與歸乎叔向對曰
其趙武乎平公曰子黨於子之師也對曰臣敢言趙
武之為人也立若不勝衣言若不出於口然其身舉
士於白屋之下者四十六人皆得其意而君賴其利
及文子之死也四十六人皆就賓位故晉國之推賢
者莫文子若也漢末邑仲卿舒人也以治行入為大
司農惇厚公直不可交以私膠東相張敞與之書曰
明主游心太古廣延茂士此誠忠臣竭思之時也敞
遠守劇郡馭於繩墨胸臆約結固無奇耳即有亦安
所施足下以清明之德掌周稷之業猶饑者甘糟糠
穰歲餘梁肉有無之勢異也昔陳平雖賢須魏倩而
後進韓信雖奇賴蕭公而後信故事因時各達英雄
如必伊尹呂望而後薦之則此人不因足下而進矣
邑感其言始薦達賢士大夫朝廷多得其助焉昔子
貢問於夫子曰春秋之大夫孰為賢也夫子曰其鮑

叔子皮乎子貢曰抑其管仲子產也夫子曰吾聞鮑叔之薦管仲子皮之薦子產至於管仲子產則未有所舉也故舉賢推能則惟鮑叔子皮有焉

臣觀舉賢之說春秋尚之後世以權歸於上外避朋黨而陰固爵祿是或一道也

任舉章第十三

儒有聞善以相告也見善以相示也爵位相先也患難相死也久相待也遠相致也其任舉有如此者

任舉之事人主之所惡也然不任舉則人臣無以事其君通者相讓任者相助有善相引有過相規名位相讓功過共事久而不渝遠而不疑故朋友之誼正而後君臣之道備使為人臣者自私其身聞見違人

利祿與已得則據之不任一人不舉一事上諫其君
下悅妻子此則傭隸之所治也儒者以善公之人以
賢分之友以爵祿公之天下人君以是
取臣則朋黨之疑消彙征之途闢也

方春秋時列國卿士相與善者有吳季子鄭子產晉
叔向范宣子季札過鄭子產貽之鰒帶季子報以紵
衣讎就學焉病就宿焉語執政而必歸之禮也子產
之鑄刑書叔向以書告之曰始吾有虞於子今則已
矣昔先王議事以制不為刑辟懼民之有爭心也是故
閑之以義糾之以政行之以禮守之以信奉之以仁
制為祿位以勸其從猶懼其未也故誨之以忠使之
以和泄之以彊斷之以剛猶求聖哲之士忠信之長
慈惠之師民於是可任使也不生禍亂民知有辟則
不忌於上並有爭心以徵於書徵倖而成之不可為
矣夏有亂政而作禹刑商有亂政而作湯刑周有亂
政而作九刑三辟之興皆叔世也今吾子相鄭國作

封誼立謗政制參辟鑄刑書欲以靖民不亦難乎詩
曰儀式刑文王之典日靖四方又曰儀刑文王萬邦
作孚如是何辟之有民知爭端則將棄禮而徵之書
雖刀之禾將盡爭之亂獄滋豐賄賂並行終予之世
鄭其敗乎肝聞之國將亡必多制其此之謂矣子產
復之書曰若吾子之言僞不才不能及遠吾以救世
也既不承命敢忘大惠及范宣子聽晉政諸侯之幣
重子產寓書於子西以告宣子曰子為晉國不聞令
德而聞重幣僞也惑之僞聞君子長國家者非無賄
之患而無令名之難諸侯之賄聚於公室則諸侯貳
若吾子賴之則晉國貳諸侯貳則晉國壞晉國貳則
子之家壞何沒沒也夫令名德之興也德國家之基
也有基無壞無亦是務子有德則樂樂則能久詩云
樂只君子邦家之基有令德也上帝臨汝無貳爾心
有令名也恕思以明德則令名載而行之是以逮至邇
安母寧使人謂于實生我而謂浚我以生乎家有齒以

焚其身賄也宣子悅乃輕幣故如叔向
子產則可謂聞善相告見善相示者矣

被廬之蒐晉始作三軍謀元帥於趙衰趙衰曰郤穀
可臣亟聞其言矣說禮樂而敦詩書詩書義之府也
禮樂德之則也德義利之本也君其試之乃使郤穀
將中軍郤縠佐之使狐偃將上軍讓於狐毛而佐之
命趙衰為卿讓於欒枝先軫佐之荀林父御戎魏犢
為右郤穀卒先軫將中軍胥臣佐下軍上德也及後
狐毛卒使趙衰代之辭曰城濮之役先且居之佐軍
也善軍伐有賞善其君有賞能其官有賞且居有三
賞不可廢也且臣之倫箕鄭胥嬰先都在乃使先且
居將上軍公曰趙衰三讓其所讓皆社稷之衛也以
趙衰之故蒐于清源作五軍趙衰將新上軍箕鄭佐
之胥嬰將新下軍先都佐之胥諸君子於是多讓也
故爵位相先則趙衰狐偃諸賢之謂夫夷之蒐時先
軫已没于秦師趙成子欒貞子霍伯曰季皆卒矣公

欲使箕鄭父先都將上軍士穀梁益耳將中軍趙盾佐之曰狐趙之勲不可廢也使狐射姑將中軍趙盾佐之綿上之蒐則范匄為政故晉人三蒐而卿大夫之名著於天下爵位相先之謂也

宣王之末年王政始衰杜伯驟諫王欲殺之左儒不可王遂殺之左儒曰臣而失言於君不忠失情於友不信遂死之蓋自是周無諍臣也荀林父之敗歸而請死晉侯欲許之士貞子諫曰不可城濮之役晉師三日殺文公猶有憂色左右曰有喜而憂如有憂而喜乎公曰得臣猶在憂未艾也困獸猶鬪況國相乎及楚殺子玉而後喜可知也曰莫余毒也已晉再克而楚再敗也今天或者大警晉也而入殺林父以重楚勝何以脫乎林父之事君也近思盡忠退思補過社稷之衛也若之何殺之於是晉侯使復其位叔孫豹會諸侯于訖而季孫宿伐莒取郟莒人告于會白晉盟未退而魯伐莒潰齊盟矣請戮其使於是趙

文子求貨於叔孫弗與梁其蹊曰貨以藩身子何愛焉
叔孫豹曰諸侯之會衛社稷也我以貨免魯必受師是
禍之也雖怨季孫魯國何罪叔出季處有自來矣吾
又誰怨晉人猶請乃裂裳帛而與之趙孟聞之曰臨
患不忘國忠也思難不越官信也圖國忘死貞也有
是三者又可殘乎乃為請於楚而舍之故爵位相先
患難相死士貞
子叔孫豹有焉

建武中徵范升為博士范升讓曰臣與博士梁恭山
陽守呂羌俱修梁丘易二臣年並耆艾經學深明臣
不及也而不可以時退與恭並立知羌學又不能引達
誠慙負無以立於世夫誦而不行知而不言不可以
為人師願推博士以避恭羌上不許而愈嘉其賢後
升為出要所告出繫論死楊政以箭貫耳抱升子伏
道旁草間望駕至持章叩頭白升冤且曰升三娶僅
一子今適三歲孤之可哀虎貴懼驚來與引弓射不

退旋頭办之傷胸又不退上為下尺一出升詔理官
曰乞楊生師故如范升楊政可謂爵位相先患難相
死者矣自是而後志節之士
侵習成風然非仁人不能也

鍾興嘗受公羊春秋於丁恭興以授皇太子諸王得
封闕內侯引拜興前謝曰臣無功不敢受爵上曰生
教訓太子諸王明先聖之道非功而何對曰臣經受
之師丁恭臣適傳誦耳於是詔封恭歐陽尚書尚書
博士缺上欲用桓榮榮叩頭讓曰臣經術淺薄不如
同門生郎中彭閎揚州從事畢凱上不許乃拜榮為
博士引閎為議郎當建武中豫章何陽以選明經授
太子書上從容問若木師誰也曰臣師沛國桓榮上
即召榮問尚書大善之曰得生幾晚當時司徒歆坐
汝南度田不實論死諸生守闕求哀者千餘人至有
自髡剔者平原禮震十七自繫求代死而歆已歿死
獄中於是掾陳元上書追理得賜卹綬贈賻焉及後

黨錮禍發李固杜喬先死非命有詔暴尸敢臨者族
固弟子汝南郭舉年甫成童左持章奏右貫鈇鎖乞
收葬不許乃往臨哭前陳辭與南陽董班守固喪不
去太后聞而不誅會喬故掾楊匡聞喬死號泣星行
至洛著故赤幘為門亭史守護尸驅蛇蚊積十二日
乃要鈇鎖詣闕請收骸太后許焉蓋是時重經師氣
節相勵故爵位相先患難相死則東漢諸賢盛於春秋矣

庶范叔度永平初隴西太守鄧融辟為功曹會融為
刺史所業當得重譴欲以權相濟託病去融大恨之
范東至洛變姓名為廷尉獄卒居亡何融果繫獄范
侍衛左右甚勞苦融怪其為范而殊不意謂之曰卿
何似我廉功曹范詭之曰君困眩瞽耶融繫久疾病
范隨養視竟融死不言身自將車送喪至南陽葬畢
乃去後辟公府所受學師薛漢坐楚獄誅眾莫敢視
范往斂收之帝召入詰責范叩頭曰臣愚無狀以為

漢已伏誅亦足示國法矣誠不忍師資之情罪當坐
帝以其詞直壯之問曰若宜庶頗後耶與右將軍褒
大司馬卅有屬乎對曰褒臣曾祖丹臣祖也帝曰怪
卿膽志乃爾知是也以為雲中守其後有戴就者為
郡倉曹掾太守成公淳坐誣賊罪部從事薛安按之
收就下獄使證太守備五毒不易辭又燒銀斧使就
挾於肘腋就語獄卒熾之勿冷也每上彭考因止飯
食投體中焦肉墜者自啗食之又覆船下薰以馬通
以大針刺指中卒不肯服安乃呼謂之曰太守罪穢
狼籍卿何故以骨肉相扞就對曰太守剖符大臣以
死報國卿雖銜命宜申斷冤毒奈何誣枉忠良強相
掠理令臣謗其君子證其父乎安奇其節乃解械更
與美談表釋其事故廉范而降至於戴就亦可謂患
難相死者矣當戴就時有繆彤仕縣為主簿縣令被
章見考諸吏皆畏懼自誣彤獨證據其事掠考備至
體生蟲蛆更換五獄踰涉四年令卒以免隴西梁湛

召為決曹史湛病卒彤送還隴西會西羌亂湛家皆
避去他郡彤獨留不去為起墳冢潛穿土窟晝伏夜

作及賊平而墳已立是皆未至於中道
也而激勵名節為難能雖通儒無譏焉

漢魏而後士怵於死黨之說蓋自杜衆與李雲並誅
而廷無危論又自陳容與臧洪俱死而世少安瀾至

於孫丞斷踝以明二陸劉濂結衣以從其兄南北人
才彫墜盡矣唐宋之薦舉與晉魏之表讓半為空名

其悃悃推遜惟要師德虛懷慎有足稱焉師德稱戰
將有邊功而龜勉受唾以承垢師德嘗薦狄仁傑可為

宰相仁傑不知也數短之武后謂仁傑曰師德賢乎
仁傑曰師德往為將謹守著勞賢則不知也又問師

德知人乎仁傑曰臣與共事久未見其知人后曰朕
知卿乃師德所薦也亦可謂知人矣出其奏示之仁

傑慙出而太息曰婁公盛德包容我久我終不能測
其涯際矣盧懷慎以清儉聞不營產業得祿賜遂散

於故人親戚輒盡及在大位自以才不及姚崇每事皆推崇久之以疾乞骸又薦宋璟李傑李朝隱盧從愿既屬疾宋璟盧從愿往候之見敝簀單席門不具帷箔會風雨至舉席自障日晏食蒸豆二器酒數杯別已執二人手曰上求治業倦勤將有憊人東間而進者公等志之其遠慮如此武后時嘗問仁傑曰朕要一好人任使有乎仁傑對曰何所用之武后曰使為將相耳仁傑曰料陛下若求文帝資歷則今之李嶠蘇味道足矣豈非文士齷齪思得大才用之以成天下之務乎武后悅曰是也仁傑曰荊州長史張柬之其人雖老真宰相才也且久不遇若用之必盡忠於國家后即徵為洛州司馬他日又求賢仁傑曰臣前言張柬之未用也后曰已遣之矣仁傑曰臣以為可相非可為司馬乃遷秋官侍郎及姚崇將赴靈武后又令舉内外可為宰相者崇曰張柬之沈厚有謀能斷大事且其人年老惟陛下能用之即時召見為

同鳳閣侍郎平章事故如婁師德盧懷慎狄仁傑姚崇者可謂知所任舉者矣

唐時天子猶留意於人才如常何之於馬周張循憲之於張嘉貞皆發一策核一事奮跡天衢之上最後稱李吉甫之納裴垵取筆疏列二十餘人數日之內拔用殆盡然互有短長不臻於純儒宋時稱呂蒙正聖功為相孜孜以薦引人才為先務每四方官吏請謁必問其所在人才姓名行事去輒疏記藏素袋中有一人數見稱引輒先用故在位朝列咸稱得人真宗東封行過洛即其家省之引見諸子問誰可用者對曰臣諸子皆駕不足用有姪夷簡任潁州推官宰相才也客有富言者白見其子請得侍太祝學許之既見大驚曰此兒他日名位與吾埒而勲望過之勅諸子禮貌則鄭公弼也嘗問諸子曰我為相外議云何對曰大人居位甚稱但外人頗云無能蒙正笑曰我信無能但有一能能用人耳其後有虞允文彬甫

欽定四庫全書

卷下

初在郎署為秦檜所擯不用既與相康伯有舊亦不相往來乾道初始以陳俊卿薦參大政尋出撫蜀已復召為相嘗稱宰相以人才為要務每以人才列為三等有聞見軌記之號館才錄次第舉用其所甄薦如洪适汪應辰胡銓周必大王十朋趙汝愚李燾之倫皆一時名賢又舉梁克家自代遂與併相允文生於衰朝以采石之勲動主知不能與前宋比績而具薦名士抑金使薦朱熹識器邁於時賢故任舉之道呂蒙正庾允文有焉

史魚數薦蘧伯玉於靈公靈公曰諾其後未用史魚入曰臣聞抱玉人庭不如貢賢夫國危者則思安安國以人思人以賢君何疑焉靈公未之信也以謂史魚庭寢虛飾良久乃應之火魚出謂其子曰昔禽息碎首以薦百里奚吾則未能也今言伯玉於公而公不信則不如死也將自殺以明之曰我死勿斂用伯

王乃歛靈公聞之曰痛哉寡人徒以史魚譙退欲進士也而不意其信如此也是寡人之罪也乃拜伯玉而後哭史魚也伯玉使於楚逢公子皙濮水之上接草而待曰聞上士可以託色中士可以託詞下士可以託財三言者固可得託乎伯玉曰謹受命伯玉見楚王使事畢從容言士王曰何國最多士伯玉曰惟楚多士而楚不能用王曰何也伯玉曰子胥生於楚而吳善用之賁臯生於楚而晉善用之今者臣之來逢子皙濮水之上是將使吳用之乎使晉用之乎於是楚王發使者追子皙於濮水之上是非伯玉之言而楚先臣之言也由其道亦可以久遠故久相待遠相致則史魚蘧伯玉有焉臣觀任舉之事曰適易生漢人救以連坐其弊愈滋要以儒術相資不為黨耳

特立獨行章第十四

儒有澡身而浴德陳言而伏靜而正之上弗知也麤而翹之又不急為也不臨深而為高不加少而為多世治不輕世亂不沮同弗與異弗非也其特立獨行有如此者

道在天下德在一身專而治之以為靜公而與之以為正言者不得已而鳴之也急於知則有智名急於為則有勇功臨深為高非勇也加少為多非智也以為可為而輕為之則與世同治以為不可為而不為則與世同亂異同在於世是非正於已易曰上火下澤睽君子以同而異火之與澤皆靜也或上或下皆正也火不臨澤澤不加多二女異志不言而分行故謂之睽易曰澤滅木大過君子以獨立不懼遯世無

問允若少也。兵者長也。允陳而兵伏。少女將外長女在內。則必有取之者矣。失是不取。過不在我。故謂之大過。君子之在同而異。獨立不懼。則取之此也。人臣以是事君。則怨惡少而禍譴不至也。魯有周豐者。哀公執贄請見之。不可。公使人問焉。曰：有虞氏未施信于民而民信。夏后氏未施敬於民而民敬。敢問何施而得此於民也。豐對曰：君不察乎墟墓之間。未施哀於民而民哀。宗廟社稷之中。未施敬於民而民敬。殷人作誓而民始畔。周人作會而民始疑。苟無禮義忠信誠懇之心。以蒞之。雖固結之民。其有不解乎。是非周豐之言。而夫子之言也。哀公問孔子：寡人生乎深宮之中。長乎婦人之手。寡人未嘗知哀也。未嘗知憂也。未嘗知勞也。未嘗知懼也。未嘗知危也。孔子辟席曰：吾君之問乃聖君之問也。丘小人也。何足以言之。哀公曰：微吾子。吾無所聞之矣。孔子就席曰：然君入廟門。升自阼階。仰見榱桷。俯見几筵。

其器存其人亡君以此思哀則哀安不至矣君昧爽櫛冠平旦聽朝一物不應亂之端也以此思憂則憂安不至矣君平旦聽朝日昃而退諸侯之子孫必有的在君之門廷者以此思勞則勞將安不至矣君出魯之四門以望魯之四郊亡國之墟列可數也以此思懼則懼安不至矣丘聞之君者舟也庶人水也水以載舟亦以覆舟以此思危則危安不至矣夫執國之柄履民之上涼乎以朽索馭奔馬易曰履虎尾詩曰如履薄冰危之至也周豐之言蓋本於此故澡身浴德陳言而伏靜而正之則周豐有焉

桓公田至於麥丘見丈人焉問曰子年幾何矣曰八十有三公曰美哉壽乎子以壽祝寡人麥丘丈人曰祝主君使主君甚壽金玉是賤人民是寶桓公曰善哉至德不孤善言必再麥丘丈人曰祝主君使主君無羞學無恥下問賢者在側諫者得人桓公曰善哉至德不孤善言必三麥丘丈人曰祝主君使主君無

得罪於羣臣百姓桓公佛然曰此一言者非夫前二
言之匹也請更之大人再拜而起曰君熟思之此一
言者前二言之長也臣聞子得罪於父可因姑姊妹
以謝也臣得罪於君可因左右以謝也昔者夏桀殷
受得罪於羣臣百姓莫為謝者至今不赦公曰善扶
而載之自御以歸夫麥丘之言甚似夫祝鳧已疵之
言也桓公踐位令釁社塞禱祝鳧已疵獻胙焉祝曰
使除君之苛疾與君之多虛而少實桓公不悅瞋目
而祝祝鳧已疵又授酒更祝之曰使去君之多虛少
實又與君之若賢桓公怒將誅之以告管仲管仲曰
是善祝也君不自賢則受胙永年故麥丘吏
人祝鳧已疵亦可謂陳言而伏靜而正者矣
魏文侯見箕季其牆壞而不築文侯曰何為不築對
曰不時其牆枉而不端問曰何為不端曰固然從者
掘園之桃李禁之少焉日晏進疏糲之食瓜瓠之
羹文侯出其僕曰君亦無得於箕季矣文侯曰何謂

無得於季也。吾一見季而得四焉。牆壞不築，云待時者。教我無奪農時也。牆枉不端，云固然者。教我無侵封疆也。園不掘，桃李豈愛桃哉？教我無下無侵上也。食我以糲羹，豈不能具五味哉？教我無多斂以省飲食之養也。甚矣箕季之似子罕也。士尹池為楚使於宋，子罕享之。宿子罕之舍，南家有牆擁於前而直，西家之潦經其宮而不止。士尹池問之，子罕曰：「南家執工也，徙之曰：『吾待執而食三矣。』今徙則邦之求執者不。知吾處也，吾將不食，是以不徙。西家高吾宮，平潦之經吾宮也，利何可禁也？」士尹池歸，謂楚人曰：「宋不可攻也。其君賢，其相仁，賢者得民，仁者能用，人故子罕與箕季可謂靜而正之上弗知者矣。」魏文侯則可謂也。知也。

晏子之宅近市而湫隘，景公命更之。辭曰：「君之先臣容焉，臣不足以嗣之。」於臣侈矣，且小人近市朝夕得所。

求小人之利也敢煩里旅公笑曰子近市識貴賤乎
對曰踊貴屨賤蓋時繁刑鬻踊者多公聞之為之省
刑及晏子如晉公更其宅反則成矣既拜而毀之謂
里人曰非宅是卜惟鄰是卜二三子先卜鄰矣違卜
不祥君子不犯非禮小人不犯不祥因陳桓子以請
乃復其舊甚矣晏子之言似管子也桓公觀於廡間
廡吏曰廡何事最難廡吏未對管仲對曰夷吾嘗為
園人矣傳馬棧最難先傳曲木曲木又求曲木則曲
木已傳直木無所施矣先傳直木直木又求直木則
直木已傳曲木亦無所施矣如管仲晏子之言則所
謂靜而正之上不知者矣

張釋之從文帝登虎園帝問上林尉禽獸簿十餘問
不能對虎園嗇夫從旁代對甚悉文帝曰吏不當如
是耶尉無賴召釋之拜嗇夫上林令釋之久之前曰
陛下以絳侯周勃何如人帝曰長者也又問東陽侯

張相如何如人帝復曰長者釋之曰夫絳侯東陽侯
稱長者此兩人言事曾不能出口豈教此番夫喋喋
利口捷給哉且秦以任刀筆吏亟疾苛察相高無惻
隱之實以故不聞其過今陛下以番夫口辨起遣之
臣恐天下風靡不可不察也於是拜釋之公車令太
子與梁王入朝不下司馬門釋之効之太后使使赦
太子梁王乃得入故如釋之者非急為處翹者也汲
黯為主爵都尉武帝對汲黯言治云吾欲云云汲黯
對曰陛下內多欲而外施仁義奈何欲效唐虞之治
乎帝默然變色罷朝或嘗黯黯曰天子置公卿輔弼
之臣寧令從諛承意陷主於不義乎張湯更定律令
黯於帝前質責之曰湯為正卿上不褒先帝之功業
下不能化天下之邪心安國富民使囹圄空虛何乃
取高皇帝約束紛更之為也至乃罵曰天下謂刀筆
吏不可為公卿果然如汲黯則可謂處翹者矣然觀
其斥公孫弘揖衛青諫殺近臣正廟樂章何其靜而

正也

張擇之從帝出中渭橋有人從橋下出走驚乘與馬
使騎捕屬廷尉釋之訊無他比犯蹕當罰金上怒曰
此人親驚吾馬吾馬賴和柔不敗安得輕比釋之曰
法者天子所與天下共也今法如此而更重之是法
不信於民也其後有人盜高廟座前玉環捕得下廷
尉當棄市上大怒曰人無道乃至盜先帝廟器吾欲
致之族而君以法奏之非所以共承宗廟也釋之免
冠頓首曰法如是足也今盜廟器而族有如萬一愚
民取長陵一抔土將何以加其法乎上白太后乃許
廷尉是故如釋之則可謂靜正者矣當汲黯時渾邪
王率衆來降漢發軍二萬乘迎之縣官無錢從民貰
馬民或匿馬不具上怒欲斬長安令黯進曰長安令
無罪獨斬臣黯民乃肯出馬且匈奴畔其主而降漢
漢徐以縣次傳之何至今天下騷動罷弊中國以事

夷狄之人乎帝默然及渾邪王至賈人與市者生當死五百餘黯請見高門曰大匈奴攻當路塞絕和親中國興兵誅之死傷糜費不可勝計臣以為陛下得胡人皆以為為奴婢賜從軍死事之家所繭獲因予之以謝天下塞百姓之心今既不能入虛府庫賞賜發良民侍養若奉驕子愚民何知市買長安中物而文吏繩以為闡出財物如邊關陛下縱不能得匈奴之資以謝天下又以微文殺無知者五百餘人是所謂

底其葉而傷其枝也由是而觀則是汲黯之靜正汲黯之不急為也

鮑永君長司隸校尉宣子也事更始擊青犢有功封中陽侯光武即位徵之不至知更始亡乃發喪封上將軍列侯印綬幅巾詣河陽謁帝帝問永卿眾安在永辟席稽首曰臣事更始不能安全誠慙以其眾幸富貴悉罷之矣帝曰卿言大而意不悅時攻懷未拔拜諫大夫謂之曰關東素畏卿卿可將故人詣城下

曉譬竟降之還賜洛陽里第謝不受又為司隸校尉
勅趙王良不敬朝廷肅然時扶風鮑恢亦抗直不避
強禦帝所謂貴賤斂手以避二鮑者也永行縣道經
更始墓下引車入陌前趨拜從事止之永曰寧有親
北面事人而過墓不拜者乎竟下拜盡哀去至扶風
椎牛上荀諫冢帝意頗不平張湛追曰仁者行之宗
忠者義之至仁不遺親忠不忘君思之篤也帝
意乃釋故不臨深為高不加少為多鮑永有焉
史弼公謙少篤學辟公府遷北軍中候勅渤海王險
僻乞露章宣示帝以至親不忍下其事也遷尚書出
為平原相時詔舉鈞黨郡國所奏連至數百弼獨無
所上詔書前後切責從事掾問曰朝廷疾惡黨人旨
意懇惻青州六郡其黨有五近國甘陵分南北部平
原何理而得獨無弼曰先王疆理天下畫界分境水
土異齊風俗負異他郡自有平原自無何可相比若
承望上司誣陷善民濫刑以逞則平原之人戶可為

黨相有死耳所不能也從事大志即收邵僚下獄為
章劾弼會黨禁解得贖免既當舉孝廉中常侍侯覽
遣諸生齋書請之并求假鹽稅弼收付安邑獄遂考
殺之覽因誣弼誹謗檻車徵下廷尉平原吏人奔走
詣闕訟之前孝廉魏劭毀瘳形服為家僮護弼弼遂
受誣當棄市劭與同郡人賣郡邸以賂覽得減死輸
作故不臨深為高不
加少為多史弼有焉

皇甫規威明當西羌叛時寇三輔規方年少策將軍
馬賢必敗既而果然乃上書自請討羌不許沖質間
舉賢良方正對策論大將軍冀河南尹不疑為權貴
所惡自免歸冀誅拜泰山太守會諸羌復叛復自請
討羌詔以為中郎將持節監關西兵討零吾破之諸
羌慕義降者十餘萬諸中貴又共誣陷之乃上疏自
訟曰臣前糾李翁等五臣五臣支黨半國中交構豪
門競流謗讒云臣私結諸羌酬以金錢若臣私財則

家無擔石如出官物則文簿可稽就臣愚惑審如人
言能賂羣羌令來降者前世尚賂匈奴以宮姬鎮烏
孫以公主臣以私財柔服叛羌何罪之有自永初來
將出覆軍者五動費鉅億有旋車完封寫之權門而
名成功立厚加封爵令臣選督本土絕交離親衆謗
陰害固其宜也乃得徵還竟輸作左較後復拜度遼
將軍以送客越境及附黨自劾不報如皇甫規
者雖麤翹亦可謂世治不輕世亂不阻者矣

蓋勲元固為漢陽長史與從事蘇正和有仇及正和
案武威太守罪權貴恨之刺史梁鵠欲殺正和以為
解勲力保全之正和詣謝勲亦不見也後刺史左昌
盜軍資十萬苦勲數諫遂與勲別也及為賊所圍勲
亟還救之而免後救夏育於畜官兵少為羌所敗身
被三創不動羌湏吾者知勲曰蓋長史賢人殺之為
負天下與之馬勲叱死不肯上羣羌服其義乃送還
漢陽及董卓廢少帝不道勲質責之曰昔伊霍權以

欽定四庫全書

卷下

立功猶可寒心足下何以終此賀者在門弔者在廬
矣卓心憚之是時公卿而下見卓皆不敢仰視惟黜
與穴禮會司隸校尉缺王允欲推黜卓曰此人明智
有餘不可假以雄職乃以為越騎校尉一日朱雋詣
卓卓忽怒曰我百戰百克皆決於心卿勿妄言汚我
刀黜正色曰昔武王明聖猶求箴諫況如卿者而欲
杜天下之口乎故如蓋黜亦可謂世治
不輕世亂不沮同弗與異弗非者矣

用世之士特立獨行宜其難也出世之士皆非異已
者見阻於亂世臨深為高收聲而伏隱約而已矣夷
考其行澡身浴德不輕不沮捐同異泯高多動靜合
宜有裨於世道其惟黃憲仇香管寧陳寔鍾皓邴原
諸君稱焉間見諸
篇故不復陳也

臣觀特立之儒不以陳言自見間亦有之
必以草野麤翹見譏故聖人特著之於此

規為章第十五

儒有上不臣天子下不事諸侯慎靜而尚寬強毅以與人博學以知服近文章砥厲廉隅雖分國如錙銖不臣不仕其規為有如此者

天子無不仕之臣則有養畜臣下之心儒者有仕宦之心則其規為賤於奴隸矣慎靜尚寬強毅與人博學知服廉隅文章此四者皆大臣之器也然非其道義不臣不事孟子曰達可行之天下而後行之達不可行之天下而行之則其規為有不足觀者矣易曰嘉遯貞吉以正志也肥遯無不利无所疑也正志則于祿者知愧無疑則終遯者不悔火在于山天用其明澤在于山天用其清二者嘉肥之藪也天子以是

欽定四庫全書

卷下

取其臣故頑貪絀而先王之道舉也

建武初物色嚴光久之未得也後齊國有得之釣澤者三聘乃至上即日幸其館光卧不起上即光所撫光腹曰咄咄子陵獨不可相助為理乎又卧不應良久乃張目熟視曰昔唐堯著德巢父洗耳士固有志何相迫乎帝曰子陵我竟不能下汝耶升輿歎息去司徒侯霸遣吏奉書前迓光光發書竟謂吏曰君房素癡今為三公寧小差否吏對曰位已鼎足不癡也光曰遣卿來何言吏述霸言屈相顧也光笑曰是非癡而何吏求報乃投劄口授之曰君房足下位至鼎足甚善懷仁輔義天下悅阿諛順旨要領絕吏求益光笑曰買菜乎求益也霸得書封奏之帝笑曰狂奴故態也帝每引光入道舊故相對累日從容問光曰朕何如昔時對曰陛下差增於往除諫議大夫不屈耕於富春山以終其後順帝時有樊英者通五經善風

角河洛七緯推災異輒效隱壺山之陽前後徵辟皆不至乃備玄纁切責州郡趣駕上道至京復稱疾不起強輿入殿不為禮上怒謂英曰朕能生君能殺君能富君能貧君君何為慢朕英曰臣受命於天生盡其命天也死不得其命亦天也陛下安能生臣安能殺臣臣見暴君如仇誓立其朝猶不肯沉得而貴之乎布衣環堵之中晏然自得雖萬乘不易入得而賤之乎臣非禮之服萬鍾不受伸其志雖簞食不厭陛下又安能富臣貧臣哉帝不能屈而重其名高為設壇場供几杖待以師傅之禮數月稱疾篤以光祿大夫賜告歸并丹大春建武末五王居北宮皆好賓客更請丹紛綸并大春建武末五王居北宮皆好賓客更請丹不能致信陽侯陰就以外戚貴寵詭說五王求錢千萬約當致丹而別遣人劫之丹不得已至就故為設麥飯蔥葉之食丹推去之曰君侯不能供甘旨安用饌先生乎俄而左右進輦丹笑曰吾聞桀駕公車豈

欽定四庫全書

卷下

謂此耶坐中皆失色就不得已去輦自是隱閉不關人事以壽終臺佟字孝威隱武安山鑿穴為居采藥自給建初中州辟不就刺史執贊見之謂佟曰考威居身甚苦如何佟曰佟幸得保全性命存神養和何苦之有如明使君奉宣詔書日夕怵惕庶事乃為苦耳遂去終隱不見如嚴光樊英井丹臺佟者亦可謂不臣不事者矣慎靜尚寬強毅與人博學知服砥厲文章或未之兼舉也韓康伯休采藥名山賣以自給口不二價者三十年有女子從買藥康守價不移女子怒曰若豈韓伯休耶乃不二價乎康歎曰本欲逃名而為市中女子所知何用隱為乃避入霸陵山中使者奉詔造康強之康不得已辭安車自乘柴車往亭長方修道奉徵君而康柴車至亭長奪其牛既乃知其徵君也使若欲治奪牛罪康曰自老子與之何罪既即路乃從車後逃去龐德公居峴山之南未嘗至城府夫婦相莊如賓獨與襄陽司馬徽善一日渡

沔上塚未反徹至徑入呼德公妻作黍云徐元直當來
俄而德公與元直至不知孰主客也劉表數延請不
能致乃就見之龐公釋耕壟上妻子耘於前表問曰
士全一身孰與全天下乎龐公笑曰鴻鵠巢於高林
之上暮而得所棲龜鼃穴於深淵之下夕而得所息
趣舍亦人之巢穴也各得所棲息而已故慎靜尚寬
強毅與人則韓

康龐德公有焉

張霸嘗云人生一世但當畏敬於人人不善加已直
為受之豈顧報哉用是道亦可以入世其後有孫登
公和者於汲郡北山為土窟居焉夏編草為裳冬散
髮自覆好讀易撫一絃琴見者皆親樂之人或擠之
水中觀其怒獨出水顧笑而已魏文使阮籍詣之箕
踞相對籍談笑終日登一無所應嵇康從之游三年
乃誠其保曜全年見其寢處惟竹實數斛杵臼一具
而已夏統仲御者會稽人也事母孝每采食星

行夜歸或勸之試仕統作色曰諸君之過我至此耶
使統屬太平之時當與元凱敷謨庶歌過濁代當與
屈生同汙其泥汙隆之際自與沮溺耦耕豈有辱身
降志州郡之下耶以母疾詣洛市藥會上已王公遊
洛車騎如雲統曝藥了不一顧賈充怪問之因為談
風土上下大禹泰伯曹娥伍胥之事慷慨刺舟而去
故慎靜尚寬強毅與人則孫登夏統有焉

皇甫謐曰貧者士之常賤者道之實處常得實沒齒
不憂生不為人所知死不為人所惜至矣介之推曰
身既隱矣安用文之然而文卒不廢於巖谷張珩子
明游太學兼通內外後歸里袁紹屢辟皆不應移居
上黨再遁常山太和中詔求隱學之士通消息復災異
者郡累上以病老不行廣平太守盧毓到官三日網
紀白承前致版謁謝不敢但遣主簿奉書致禮而已
青龍中張掖元川溫寶石負圖珎見之以為將來之

徵正始中戴篤巢於門陰珪謂門人曰戴篤陽鳥也而巢於門陰此凶羊也援琴歌之旬日卒凡百有五歲戴達安道少博學善屬文不樂當世以琴書自娛太宰武陵王晞召鼓琴達對使者破琴曰戴安道豈王門伶人哉徒會稽刻山性高潔以禮度自將深以放達為非嘗著論曰儒家尚譽本以興賢也既失其本則容貌相欺至於末偽道家去名欲以篤實也既失其本則情禮俱虧至於末薄非二末之失而弊者託二本以自縱也夫道有常經而弊無定情苟乖其本聖賢亦如之何哉故如張珪戴達者可謂博學知服近文章歟

厲康隅者矣

沈麟士武康人博通經史有高尚之心執喪盡禮居貧手織簾口誦書嘗織作誤傷手而泣或云此不足痛何泣也曰傷不痛但毀遺體而悲耳或有認其所著履者麟士曰是卿履耶笑而與之已送履還謝前

誤麟士曰非卿展耶笑而受之元嘉末以抄書至都下歷觀四部畢乃歎曰古人何人希之則是耳遂歸隱吳差山或勸之仕答曰魚懸獸檻天下一弊聖人前悟所以吉先誠未能景行坐忘奈何不希企日損乎吳興守張永欲請為功曹麟士笑曰君欲飾渾沌以蛾眉冠越客以文冕僕寧蹤東海不受此黥劓也故如沈麟士可謂博學知服者矣阮孝緒陳雷人不樂為從父後既冠之後嘗欲跡赤松於瀛海追許繇於穹谷父喪不服綿纊即茹蔬有味輒吐之外兄王晏既貴孝緒避不見嘗食醬而美問之從晏所得也遂覆醬及晏誅親戚交為之危孝緒曰親而不黨何懼竟獲免嘗入鍾山母驟病兄弟趣召之母曰孝緒行至矣果心動而反世傳母病須復孝緒從鹿行得役者也母沒後遂絕交游惟劉歆兄弟時一造見之梁兵圍建業樵蘇不宿僮婢樵鄰墓以繼火孝緒聞之不食終日故博學而知服近文章砥厲庶隅沈

麟士阮孝緒有馬孝緒初撰高隱傳上自黃炎下迄
天監分為三品以言行超逸姓氏弗傳為上始終不
撓姓名可錄次之挂冠人世棲心虛表又次之凡百
三十七人以示劉歆劉訐歆謂昔嵇康為贊缺一自
擬今四十之數將俟吾輩成之耶孝緒笑曰荀君雖
少後事當付鍾君若素車白馬之日當獲麟于二子
矣歆訐果前卒孝緒益為二傳及孝緒卒訐兄絮錄
其行次篇末故如孝緒可謂博學以知服者矣孝緒
之先有孔淳之雷次宗朱百年褚伯玉之流皆湛泉
石自處在文質之間其文學砥厲者有顧歡元平世
寒素為農夫歡貧無從受業嘗詣鄉學倚壁聽誦夕
燃松節讀書聞東遷邠元之通五經遂假傭書從之
受業母亡水漿不入口者六日廬於墓卒喪遂隱於
天台山每日出戶山鳥皆就其掌取食同時有山陰
孔佑隱四明山嘗于山谷中見錢數百斛視之與瓦
石無異嘗有鹿中箭來投佑佑為拔箭日飼之飼愈

乃去故近文章破厲廉隅顧歎孔佑亦有焉蓋自阮
孝緒而後巖谷涸于緇黃巢許纂于道釋隱居之士
幾絕間巷伏處者
其於高隱無稱焉

齊宣王召田過而問焉曰君與父孰重田過曰父重
王忿然曰曷為士去親而事君也對曰非君之土地
無以處吾親非君之祿無以養吾親非君之爵無以
尊顯吾親受之於君致之於親凡事君以為親也宣
王悵然無以應之若是則不及事其親者不宜仕於
君也漢有周磐者汝南人治古文尚書洪範五行左
氏傳言行為諸儒所宗居貧養母儉薄不充讀詩至
汝墳之卒章慨然數始就孝廉之舉和帝初令三邑
有惠政以母老棄官母卒毀頓廬墓教授常千人公
府三碑有道慨然曰吾親沒矣從物役何為遂不應
碑有何琦者廬江人少孤居陽谷事母孜孜色養患
甘鮮不瞻吏以養及母喪泣血杖而後能起殯而火

匍匐撫棺哭天為反風服闋慨然曰嚮所為出身仕者微祿養親也今無恃怙復仕何為於是怙澹養性耽玩典籍終老不交人事故如周磐何琦者親沒之後不臣不仕雖分國之半猶如錡鉢也故親沒之後而猶且仕者宜天子之所賤也

田饒事哀公三年而不見察乃請于公曰臣將去此而黃鵠舉矣哀公曰何謂也曰君不見夫雞乎戴冠文也傅距武也敢鬪勇也得食相告仁也守夜不失時信也雞有此五德君猶日淪而食之何也以其從來近也黃鵠一舉千里止君園池食君魚鼈啄君梁黍無彼五德君猶貴之以其所從來遠也今臣將去君而雲鵠舉矣然則慎靜強毅博服廉隅不見察于君則不宜臣仕也桓帝嘗徵姜肱不至乃下彭城使畫工圖其形狀可謂見察矣而姜肱不出靈帝踐阼陳寶見誅曹節思致天下名賢以弭已謗于是聘姜

肱為健為太守姜肱慨然曰吾以虛獲實徒長聲價
盛明之際尚不委質況政在私家哉遂浮海去莫知
所之延篤叔堅嘗為侍中帝數問政事婉辭密對可
謂見察矣李公又稱其有王佐之才而延篤款款安
於將廢之命消搖內階詠詩南軒願沒牖下以見父
祖故如姜肱延篤者或臣不臣或仕不仕要其規為
有以自處也故人臣事君不見察于君
而猶且臣且仕者亦明天子之所惡也

交友章第十六

儒有合志同方營道同術並立則樂相下不厭久不相
見聞流言不信其行本方立義同而進不同而退其交
友有如此者

合志同方非為此也營道同術非為黨也並立則樂
故能和相下不厭故能讓久不相見聞流言不信故
志有終而道相濟也本天者國本地者方方而後能
立立而後能行行而後義起焉立義同而進不同而
退故進不為利退不為害也同人之離先號咷而後
笑子曰君子之道或出或處或默或語二人同心其
利斷金同心之言其臭如蘭聖人之貴同也如此故
同義者君子之事同利者小人之道也人主不知利
義但曰惡同故小人讒險以敗善類人主惡同君子
尚獨而旅進者進易退者退上下蹲沓無與事君詩
曰民有肅心莽云不逮又曰自有肺腸俾民卒
狂天子以此察臣故和衷可致而讒諂不作也
少昊高陽氏娶鄒屠氏之女分姓九人曰駱明蒼舒
隤豳檮戡大臨龐降庭堅仲容叔達駱明長自為族
蒼舒而下所謂八愷也皆能率少昊之德齊聖廣淵
明允篤誠舜實舉之使布五教于四方父義母慈兄

友弟恭子孝內平外成此八愷者非其性殊皆服少
吳之教志同道同故其趣舍進退亦同也帝譽高辛
氏娶妣訾氏之女分姓九人曰摯伯奮仲堪叔獻季
冲伯虎仲熊叔豹季狸摯自為族伯奮而下所謂八
元也皆能率帝譽之德忠肅恭懿宣慈惠和舜實舉
之使主后土以撥百事莫不時序地平天成此八元
者非其性殊皆服帝譽之教志同道同故其趣舍進
退亦同也帝鴻氏有不才子掩義隱賊好行凶德醜
類惡物頑嚚不友是與比周天下之民謂之渾敦渾
敦者北方之獸無官竅自為淫樂者也少皞氏有不
才子毀信廢忠崇飾惡言靖譖庸回服讒蒐慝以誣
盛德天下之民謂之窮奇窮奇者西方之獸遇姦回
則負戴飲食遇忠信仁義之人則搏之噬之顛項氏
有不才子不可教訓不知話言告之則頑舍之則嚚
傲狠明德以亂天常天下之民謂之檇杻檇杻者東
方之獸人面虎足喜鬬不退者也縉雲氏有不才子

貪于飲食冒于貨賄侵欲崇侈不可盈厭天下之民
以此三凶謂之饕餮饕餮者南方之獸飲食無極者
也此四凶者非有殊性為不率先王之教畔堯舜之
化陰懷異志凶德相比欲竊聖明之祿位與元凱親
為仇敵者也故合志同方營道同術元凱
有馬元凱而後民獻十夫繼之者希矣

垂隴之會鄭伯享趙孟馬子展伯有子西子產子太
叔二子石從趙孟曰七子從君以寵武也請皆賦以
卒君貺武亦以觀七子之志子展賦草蟲趙孟曰善
哉民之主也抑武也不足以當之伯有賦鵲之介介
趙孟曰牀第之言不踰闔非使人所得聞也子西賦
黍苗之四章趙孟曰寡君在武何能焉子產賦隰桑
趙孟曰武請受其卒章子太叔賦野有蔓草趙孟曰
吾子之惠也印段賦蟋蟀趙孟曰善哉保家之主也
吾有望矣公孫段賦桑扈趙孟曰匪交匪敖福將焉
往保是言也欲辭福祿得乎卒享文子告叔向曰伯

有將為戮矣詩以言志志誣其上而公怨之以為賓榮其能久乎叔向曰然已侈不及五稔文子曰其餘皆數世之主也故六穆者合志而營道也伯有敗類而卒以戮其喪志之謂歟

韓起之聘鄭也鄭六卿餞之於郊韓宣子曰二三子請皆賦也亦以知鄭志子奮賦野有蔓草宣子曰孺子善哉吾有望矣子產賦羔裘宣子曰起不堪也子太叔賦蓂莢宣子曰起在此敢勤子至於他人乎子太叔拜宣子曰善哉子之言是不有是事其能終乎子游賦風雨子旗賦有女同車子柳賦蘼兮宣子喜曰鄭其庶乎二三子以君命貺起賦不出鄭志皆昵燕好也二三子數世之主也可以無患矣宣子皆獻馬焉而賦我將子產拜使五卿皆拜曰吾子靖亂敢不拜德故合志同方營道同術六穆而後五卿有焉齊侯田晏子侍於過臺子猶馳而造焉公謂晏子曰惟據與我和夫晏子對曰據亦同也安得為和公曰和

與同異乎對曰和如羹焉水火醯醢鹽梅以烹魚肉
燁之以薪宰夫和之齊之以味濟其不及以洩其過
君子食之以平其心君臣亦然君所謂可而有否焉
臣獻其否以成其可君所謂否而有可焉臣獻其可
以去其否是以政平而不干民無爭心故詩曰亦有
和羹既戒既平醢醢無言時靡有爭先王之濟五味
和五聲也以平其心成其政也聲亦如味一氣二體
三類四物五聲六律七音八風九歌以相成也清濁
大小長短疾徐哀樂剛柔遲速高下出入周旋以相
濟也君子聽之以平其心心平德和故詩曰德音不
瑕今據不然君所謂可據亦曰可君所謂否據亦曰
否若以水濟水誰能食之若琴瑟之專一誰能聽之
同之不可也如是夫天下之不同者可否可同者志
也道也志同而通道同而謀猶之和羹而鬼同享和
聲而神同聽之也故子猶之於晏
子所謂合不同方營不同術者也

欽定四庫全書

卷下

當漢初時如蕭曹張季馮公汲黯鄭當時杜延年于
定國黃霸龔遂張安世金日磾皆志同方而道同術
也鄭當時行不純儒慕長者惟恐不見誠門下客無
貴賤無留門者執賓主之禮性廉不治產奉賜以給
賓客每朝候帝問說未嘗不言天下長者其推轂士
及官屬丞史常引以為賢於己未嘗名吏與臣屬聞
人言如恐傷之也至於張安世而密矣安世嘗有所
薦引其人來謝安世大恨以為舉賢遠能豈有私謝
耶絕弗與通有郎功高不調來自言安世曰君功高
明主所知人臣執事何所短長而自言乎絕不許而
郎遷莫府長史遷去辭之官安世問以過失長史曰
將軍為明主股肱而無所薦士論者頗以為譏安世
曰明主在上賢不肖較然臣下自修而已何與薦士
其匿名迹遠權勢如此杜延年為大將軍故吏大將
軍光持法嚴延年輔之以寬會桑弘羊以反誅其子
遭亡過父故史侯史吳大將軍敬坐史吳匿反者罪

丞相千秋屢言之不聽丞相乃召二千石博士議史
吳法大將軍怒且及丞相延年乃奏記光言吏縱罪
人有常法今更詆吳恐於法已深又丞相素無守持
為好言於下其素也擅召二千石雖甚無狀然及先
帝時用事非有大故未可棄其後丞相千秋死子為
洛陽武庫令而魏相方守河南治郡嚴丞相子自免
去相私自恨曰殆矣大將軍聞此必謂我因丞相死
薄其子也已而果然故魏相之用法亦猶與杜延年
同術也于定國之為廷尉人以方之張釋之嘗念居
平處大事當依經義而自傷淺學乃迎師受春秋身
執經北面備弟子禮經術士雖卑賤徒步往過定國
皆與鈞禮其決獄平法務在哀鰥寡釋疑滯致慎重
之意及後黃霸為廷尉正數決疑獄廷中稱平遷丞
相長史坐長信少府夏侯勝非毀詔書不舉劾繫獄
因從勝受尚書獄中積三歲乃出故杜延年于定國
營道同術而又與魏相黃霸合志同方也黃霸外寬

內明習文法溫良有讓用潁川起至丞相人以為不
及丙魏于定國功名損於治郡時益其時治法嚴痛
繩羣下俗吏相歐霸有所不樂故黃霸之損乃所以
為益也方張安世時為光祿勳郎有醉溺殿上者主
事白行法安世曰奴以恚怒峨衣冠署責之其隱人過
兄自言安世曰奴以恚怒峨衣冠署責之其隱人過
類此及丙吉為相掾吏有賊罪不稱職輒與長休告
終無所案驗或謂吉曰君侯為相姦吏得成其私然
無所懲艾吉曰以三公之府有案吏之名吾竊鄙焉
故不為也有馭吏嗜酒數通蕩嘗從吉出醉嘔丞相
車上史曹白斥之吉曰是不過污我車茵耳以醉飽
之過斥士今此人何以自容則是與安世同術也凡
前漢士多大體為長者高行至京兆郡守乃激發要
於有為其志趣非賄矣武昭而後丙吉最為長者魏
相之相則丙吉引致之丙吉疾篤上自臨視問曰君
即不諱誰可代者吉辭謝曰羣臣行能明主所自知

臣愚無所識上固問頌首曰西河太守杜延年明國家法度習故事廷尉于定國執憲詳明天下自為不究太僕陳萬年養後母孝惇厚備於行止三人行能皆在臣右惟上察之後三人者居位皆稱有盛名故並立則樂相下不厭丙定侯有焉

當顯宗時有鍾離意第五倫魯恭皆志道相同施歷三世而後名節之士並立相下近於名高激以宦寺而茅茹誼喪矣意當永平間為尚書司農上簿有誤字帝怒召郎答之意入叩頭曰過誤人所時有若以為罪臣位高罪重郎位小罪輕臣當坐乃解衣就格帝意解賞郎又言百姓可以德勝難以巧服先王有至德要道民用和睦故能致天下和平災害不生禍亂不作鹿鳴之詩必言燕樂者以人神之心洽然後天氣和也願詔有司慎人命緩刑罰順時氣以調陰防帝頗采納焉肅宗時天子厭吏治苛刻下寬大之

令倫亦言臣嘗讀書記知秦以酷急亡國王莽亦以苛政自殘光武承王莽之餘頗尚嚴猛後代因之遂成風俗不可得反郡國所舉類多辦職俗吏未有寬博之選以應上求宜中明其制自太守以下拜除自京師及道出洛陽者宜皆召見可因博問四方兼以觀察其人諸上書言事有不合者但可報罷不宜加以喜怒以明在寬魯恭本魏相之意推明陰陽易十二月君子議獄緩死則亦與意倫同術也意倫亦寡所薦士惟恭所辟選高第至列卿郡守數十人而門下者生或不蒙薦舉有怨望者恭聞之但曰學之不講是吾憂也如魯恭非為苟同者矣

羊祜叔子九世清德郭奕嘗比之顏子累中書侍郎典樞要有違覆輒焚草所薦達朝士人無知者或謂其慎密已過祜曰君未三復於不密之誠乎吾懼其不及也及在荆襄墾田塞險與吳為鄰時鼎足已成

進趣未定不欲以疆場起爭始與吳人戰必尅日不
為掩襲有進論詐之策者必飲以醇酒每出吹游獵
必止晉地獲禽皆分界護還之陸抗嘗病祜饋之藥
抗立服之左右交諫抗曰豈有酖人羊叔子哉及吳
主庾亮祜始發平吳之策又曰取吳不必臣行但既
平之後當勞聖慮耳中朝初欲以祜為儀同三司祜
表讓曰今光祿李喜秉節高亮在公正色光祿魯芝
潔身寡欲和而不同光祿李膺清亮簡素正身在朝
皆服事華髮以禮終始雖歷外內之寵不異寒賤之
家而猶未蒙此選臣何以塞天下之望又封南城郡
侯祜引雷侯辭十萬戶事謝之故晉臣之稱和粹者
必曰羊祜如羊祜可謂並立則樂相下不厭者矣
魏舒陽元少不為鄉望所知常著韋衣入山澤以漁
獵為事忽一日自課百日習一經輒登第稍遷為尚
書郎時欲汰郎官非才者舒即持襆被而出曰吾其
人也後將軍鍾毓每與參佐射舒為長史常與畫籌

錄定匹庫全書

卷下

後遇朋不足命舒充之舒容範開雅發無不中舉坐
愕然莫有敵者毓謝而歎曰吾之不足以盡卿才有
如此射矣山濤沒舒領司徒所得祿賜皆散之九族
時有陳雷周震不利公辟世稱為殺公掾舒竟辟之
無患也年將及舒輒以老病遜位辭讓敦切司空衛
璠與之書曰每與足下共論此事日日未果可謂瞻
之在前忽焉在後矣故並立
則樂相下不厭魏舒亦有焉

朱勃叔陽年十二能誦詩書衣方領行矩步馬援載
知書見而愧之援兄況謂援曰朱勃速成智盡此耳
卒當從汝稟學勿畏也既而朱勃未二十已試渭城
宰及援為將軍封侯勃位不過縣令以故舊往來時
聞卑侮之言不問也及援遭薨蒞之謗惟勃上書白
焉章帝初詔故雲陽令朱勃建武中以伏波將軍爵
土不傳上書陳狀不顧罪戾懷旌善之志有烈士之
風詩云無言不讐無德不報其以縣見殺二千斛賜

勃子若孫勿令詣闕謝故如朱勃
所謂久不相見聞流言不信者矣

參軍張裔以武侯委意岑述內不平至交怨武侯與
書曰君昔在柏下柏下城壞吾食不知味後流道南
海吾寢不安席今付大任自以為古之石交石交之
道舉雖以相益割肉以相明終不相卻也況吾但委
意元倫而君曾不能居忍耶張裔聞之以是愧服魏
將軍張遼與護軍武周有隙後求交於吳質吳質辭
之遼一日過質就之曰僕托溫承委意於君何以相
孤如此吳質曰古人之交也多取知其不貪奔北知
其不怯聞流言而不信故可終也武伯南身為雄士
往者將軍稱之不報口今以睚眦之恨反成嫌隙況
質才薄豈終好是以不願也遼感其言復與周平故
聞流言不信武侯吳質有焉當其時許汜以豪氣而
詆陳登先主獨信其文武膽智造次難比雍丘以表
曹而疑臧子張超獨信其天下義士敦本能來是雖

欽定四庫全書

卷下

武健仗俠亦有儒者之一端焉其先有雷義仲公舉茂才推讓於陳重閔貢舍菽水盟心於周黨又有扶風太守引令長為拜母之交同邑前賢託妻子於後來之彦如梁統之於孔奮張堪之於朱暉或交臂杵臼之間或分手傭舂之外皆本方立義道同而進不同而退使明主見之不敢疑其黨小人值之不敢行其謗無他其道信於同其志信於獨也

臣觀書稱一德一心又稱同心同德人主惡同亦於義利辨之耳立義同則方術無不同者儒者不言方術而言志義術同而義方內方謂之君子內同謂之小人和同之間辨之此耳

尊讓章第十七

溫良者仁之本也敬慎者仁之地也寬裕者仁之作也

孫接者仁之能也禮節者仁之貌也言談者仁之文也
歌樂者仁之和也分散者仁之施也儒皆兼此而有之
猶且不敢言仁也其尊讓有如此者

儒者之務至於仁而止矣仁以盡人事發人理達人
情以為人子為人臣為人弟視天下之人道無不可
尊讓也而又獨尊讓仁者猶曰是天命之畀畝而王
故嚴毅別察中有之而不敢用也曰吾積和敬以漸
通於禮樂如此而已矣天下而有仁人者出將體五
德以君臨天下則吾勉強從事焉易曰和順於道德
而理於義益謂此也詩曰仲山甫之德柔嘉維則令
儀令色小心翼翼古訓是式威儀是力天子是若明
命使賦儒者有是八德以從事於仁則若天子賦明
命庶乎其可矣人臣以是事其君則克導疑承庶常

欽定四庫全書

卷下

吉士之任也

書易皆稱九德禮樂兼言六行其專言仁者斷自孔門為始其要歸於仁者則儒行其至矣儒行所舉十六行事皆動足經世存為人師而終之曰猶且不言仁也與論語所論由求赤陳文子諸人同意子曰中心好仁者天下一人而已好仁尚難而況於仁者乎曾子曰君子以仁為尊天下之富何富則仁富也天下之貴何貴則仁貴也昔者舜匹夫也土地之厚得而有之人徒之衆得而使之惟仁以得之也伯夷叔齊死於溝澮之間成名於天下非有土地爵祿之藉也言為文章行為表綴於天下故君子思仁畫則忘食夜則忘寐旦自省以役其身亦可謂守業矣孟子尊爵安宅之說出於此

江都易王問董仲舒曰粵王句踐與大夫泄庸種蠡謀伐吳遂滅之孔子稱殷有三仁寡人亦以為粵有

三仁也何如仲舒對曰昔者魯君問柳下惠曰吾欲
伐齊如何柳下惠曰不可歸而有憂色曰吾聞伐國
不問仁人此言何為至於我哉徒見問耳猶且羞之
況設詐以欺人國乎由此言之粵未嘗有一仁也夫
仁人者正其誼不謀其利明其道不計其功是以仲
尼之門五尺童子羞稱五霸為其先詐力而後仁義
也孔子見客客去顏淵曰客仁也乎孔子曰恨兮其
心願兮其口仁則吾不知也言之所聚也顏淵感然
變色曰良玉度尺雖有十仞之土不能掩其光良珠
度寸雖有百仞之水不能掩其瑩夫形體也色心也
閔閔乎其薄也苟有溫良在其中則眉睫與之矣瑕
疵在其中則眉睫不能匿之故曰溫良者仁之本也
魯子有疾魯元抱首曾華抱足曾子曰吾無顏氏之
仁也何以告汝夫華多實少者天也言多行少者人
也飛鳥以山為卑而層巢其巔魚鼈以淵為淺而穿
穴其中然所以得者餌也君子苟能無以利害身則

得安從至乎官怠於有成病加於少愈禍生於懈惰
孝衰於妻子察此四者慎終如始故曰敬慎者仁之
地也

子貢問孔子曰賜為人下而未知所為人下之道也
孔子曰為人下者其猶土乎種之則五穀生焉掘之
則甘泉出焉草木植焉禽獸育焉生人立焉死人入
焉多其功而不言作其報而不知為人下者其猶是
乎足非獨寬裕之謂也然而培塿不生松栢
礪确不長禾黍故曰寬裕者仁之作也

子夏問仲尼曰顏淵之為人如何若曰賜之敏賢於丘也
丘也曰子貢之為人如何若曰賜之敏賢於丘也曰子
路之為人何若曰由之勇賢於丘也曰子張之為人
何若曰師之莊賢於丘也於是子夏避席而問曰然
則四子何為事先生曰坐吾語汝曰能信而不能反
賜能敏而不能絀由能勇而不能怯師能莊而不能

同燕此四者丘不為也所謂至仁之士必見進退之利屈伸之用也故曰孫接者仁之能也是非獨孫接之謂也

子夏三年之喪非見於孔子孔子與之琴援而弦之衍衍而樂作而曰先王制禮不敢不及也子曰君子之於樂三年之喪畢見於孔子孔子與之琴援而弦之切切而悲作而曰先王制禮不敢過也孔子曰君子也子貢問曰閔子之哀不盡子夏之哀已盡而皆為君子何也孔子曰閔子哀未盡能斷之以禮子夏哀已盡能引而致之各中其節也夫禮之有節固優者之所絀劣者之所勉也故曰禮節者仁之貌也子路曰人善我善我亦善之人不善我則引之退退而已曰人善我我亦善之人不善我我則引之退退而已耳顏回曰人善我我亦善之人不善我我亦善之三子者所言各異問於夫子夫子曰由之所言蠻貊之

言也賜之所言朋友之言也回之所言親屬之言也
持是三言者可以觀人矣故曰言談者仁之文也
仲尼將游泰山行於郕之野見丈人焉鹿裘帶索拾
穗而行歌瑟瑟然適也問其年九十有五矣是榮啓
期者也問先生何樂也對曰吾樂甚多天生萬物惟
人為貴而吾得為人一樂也人有男女男尊女卑而
吾得為男二樂也人生有不見日月不免襁褓者吾
行年既九十有五三樂也故有匡之弦歌臨河而動
操拔戚之起舞舞曳屣而頌詩皆有

曾子三仕於莒而緼袍不完子路曰夫非施及貧窮
散及邦族而能如此乎晏子為相食不重肉妾不衣
帛而中外待以舉火者七十餘家賈生曰吾觀於木
瓜而知苞苴之行也厨有腐肉則將士不附鳧雁食
粟則農夫易畝故曰
分散者仁之施也

漢宣帝起民間明習吏治而丙定侯又起獄吏精於
法律及為相頗以三公而察吏心隨之不為也黃霸
亦起卒史習律令及為通官顧寬和不畸於法非其
天性溫良而然乎其守潁川也有長史許丞老病聾
督郵白欲逐之霸曰許丞廉吏雖老尚能拜起頗重
聽何傷且善助之無失賢者意或問其故霸曰數易
長史迭故迎新之費及姦吏因緣絕簿書盜財物費
耗甚多所易新吏又未必賢或不如其故徒相益為
亂凡治道去其太甚者而已薛宣亦稱能吏通法律
顧惠部刺史與郿縣事疏言部刺史開私門聽讒佞
以求失民過失呵諶及細微轉相逼促使鄉黨缺嘉
賓之歡九族忘親親之惠詩曰民之失德乾餱以愆
諺曰苛政不親煩苦傷思宜明申飭使昭然知本朝
之要務又如龔遂所云治亂民猶治亂繩不可急也
惟緩之乃可治耳是皆溫良寬裕有得於仁本而丙
吉黃霸皆起小吏捐刀筆可謂溫良者矣金日磾少

輸黃門養馬武帝行觀馬後宮羅列日碑獨不敢仰
視帝心異之知為休屠王太子後益親兩子皆帝弄
兒碑常目之兒壯不謹遂撲殺弄兒以狀聞在上左
右目不忤視者數十年賜出宮女皆不敢近後欲納
其女後宮亦堅謝不敢也使同大將軍輔少主曰勿
使匈奴輔漢他如陳寵表薦輒自手書以防泄漏及
在樞機不復教授以絕門徒樊楚之冠劍不解於身
杜安之通書藏壁如故以至於魏有長孫儉者雪中
奏事待報終日不移寸足亦可謂得仁之地者矣晉
李康嘗云清者未必慎慎者必自清故敬慎仁人之
所貴也

何武君公為揚州刺史數政有度時戴聖為九江太
守自以大儒間有不法武或舉刺屬郡輒云後進生
何知徒亂人治既武廉得其罪欲棄之聖懼不免盛
毀武於朝武聞之終不揚其惡而聖子為郡盜得繫

盧江聖自以子必死武為平反得生始大慙服也又如劉寬典三郡未嘗一挫辱吏卒翻羹汚朝衣聲色不異疑有以自鎮者皆風氣使然亦資學問之力也

隋時牛弘有弟弼醉射殺弘駕車牛弘還第妻迎謂曰叔射殺牛但答曰作脯妻入云此是異事但曰已知之顏色不異讀書自若是猶為弟故有盧昌衡者嘗行浚儀道中所乘馬值人牛觸死牛主前謝罪求還直昌衡謝之曰六畜相牧固其性豈人情哉君又何謝焉然是猶為畜故有李士謙者家饒財以賑施為事鄉里閭閻為產不均輒舉資益之有奴醉與鄉人角力而斃其人惶怖請罪士謙曰本無殺心何為

用謝然可遠去無為吏所得也如牛弘盧昌衡李士謙者可謂寬裕者矣

晉劉弘和季江左之名儒也元康中撫荊州寬刑省賦公私賴之值陳敏叛於江東弘遣陶侃討之或以

侃與敏有舊侃聞遣子洪詣弘自固弘曰匹夫之交猶不負本心況丈夫乎表洪為參軍遣之侃果破降敏時東海與河間治兵或說弘曰張光太宰腹心公既與東海宜斬光以明向背弘曰宰輔失德州將何與馬危人自安吾不忍為也因表用光又遺趙顥書勸解兵息門不聽乃一意表率江漢每有注措貽守相手書丁寧款密人皆感悅自効咸云得劉公一紙書賢於十部從事遠矣

宋謝密弘微謝混之從子也諸兄弟瞻晦輩並有時譽混謂瞻等曰汝等雖才義豐瞻何能愜心至於微子吾無間然義熙中混坐劉毅黨誅混妻晉陵公主守節密產饒積千萬主督殷好擣繭悉供戲具內人以弘微孫順悉不敢爭或曰君家物產乃為殷家戲具譬棄物江海豈為廉乎弘微曰親戚言財為鄙之甚內人能無言豈可復道使爭耶故如劉弘之理國謝密之理家可謂得仁之能者矣

南北分裂禮教陵夷當魏時有蘇綽僕射周忠達稱其有王佐才嘗與宇文泰如昆明池觀魚至城漢故倉地問左右知者惟綽歷歷道之既興機密始制為文案式朱出墨入及計帳戶籍之法後代遵用之又為六條詔書以理身心敦教化重農桑擢賢良卹訟獄均賦役為本務皆原性情歸仁恕懇懇有先民之遺焉是雖不專於禮讓而施於條教俱有其節文亦可謂得仁之貌者矣

梁有劉瓛子珪五歲聞舅孔熙先讀管寧傳欣然慕之曰此可學耳與弟廋共據一蓮室為風所偃共正衣冠講誦不廢也衣絮薦為祕書郎不就衣絮死難微服往哭之極哀齊高帝召入華林園諮政道答曰政在孝經但鑒前軌之失資以寬厚耳帝太息曰儒者之言可寶萬世以資輕但授記室博士不望也瓛姿形纖小採據甚博當世推為大儒比於賈鄭嘗講月令謂門徒曰江左以來陰陽歷數學廢久矣吾講

此曾不能髣髴其自抑如此嘗患祖母病疽經年煮藥漬指為爛年四十未娶齊高為娶王氏女鑿壁掛履土落母牀母不悅即遣之居憂卧廬中足為之屈杖不能起是雖無當於禮節也然推其意本於孝經施於講誦可謂得仁之貌矣

江左既尚清言王何銜樂一時推重遂為月旦之餘波講學之權始然其簡約澹致不可少也衛玠嘗言人有不及可以情恕非意相干可以理遣故終身不見喜愠之色然玠為公孫蚤登華要涉世尚淺據其所得未深於輔嗣也要於出處之隆過輔嗣遠矣

王承王湛子也清修寡欲言不飾說獨明指要約而能通時人比之樂廣東海王越敬禮之勅其子曰學之所益者淺體之所安者深王參軍人倫之表也汝其師之見朝政漸替請出為東海太守政尚清靜不

為苛察有得盜池魚者承訖之曰文王之沼與眾樂
之池魚何足問乎吏縛犯夜者訊之云從師受書不
覺日暮承慰遣之曰奈何鞭撻甯越以立威名既棄
官東渡江逢世亂人懷危懼承每夷然不見憂喜之
色一日至下邳登山北望慨然曰人言愁我始欲愁
耳子述三十未知名司徒導辟為中兵屬既見無他
言但問江東米價述張目不答導曰王掾不痴人何
言癡也嘗燕見導發言一生數美述正色曰人非堯
舜安得每事稱善導改容謝之蓋猶有湛承之風焉
顏含宏都少以操行聞引趙簡子事於夢中事病兄
者也後累官侍中時王遵隆重時論謂百僚宜降禮
太常馮忱問含舍不答退而曰吾聞代國不問仁人
向者馮思祖問佞於我我豈有邪德乎為歎惋累日
郭璞嘗過舍欲為之筮舍曰年在夫位在人修已而
天不與命也守道而人不知性也自有性命無勞著
龜璞大歎服或問江左羣士優劣答曰周伯仁之正

鄧伯道之清才望之節餘則吾不知也
故如王承顏舍者可謂得仁之文者矣

陶潛太司馬侃之曾孫也閒靜少言不慕榮利環堵
蕭然不蔽風日著文章以自娛以為任真無所先任
真者洞然於天他無所得先也自以為世晉臣恥屈
身異代屢徵不起嘗為州祭酒不數日解去又為彭
澤令郡遣督郵行縣吏白當束帶見之潛數曰我不
能為五斗米折腰即日解印綬去來詞又賦
歸田園居詩時登廬山游觀與逸人往還其吟詠沖
適歸於自然三百篇而後未之有也宋有邵雍字堯
夫世燕人也讀專苦寒不爐暑不扇夜不就枕席數
年道乃通適吳楚周流齊魯梁晉之墟久之還其城
廬於百源之上最後居洛陽蓬華環堵不蔽風雨躬
糞以養父母浩然自得出與文彥博富弼司馬光程
顥遊以道誼相伯仲其為詩滿然出於簡策之外與
天地萬物鼓吹醇氣故如陶潛邵雍可謂分仁之和

者矣

東漢時有韓韶者為羸長周卹百姓有童恢魏霸之
風賊相戒不入境有流民入界者萬餘韶慰其饑困
開倉廩贍之主者爭不可韶曰長活溝壑之人而以
此獲罪含笑入地矣太守知韶名德無所坐陳重雷
義世所稱雷陳者也並為尚書郎義代同臺即受罪
黜重亦以病免重嘗代同舍郎償負錢數十萬終不
言義亦濟人死罪者以金謝堅不受金主伺義不在
默委金承塵而去後發屋得金而金主已死無從還
乃以付縣曹故如陳雷是惟有意為善非市之也李
士謙嘗出粟數千石貸閭里租值歲歉莫能償羣趣
謝士謙曰吾本國賑贍豈求利哉設粥待餓者全活以萬
後歲熟來償訖不受值大饑設粥待餓者全活以萬
計或謂士謙曰子陰德多矣其必有後士謙曰所謂
陰德猶之耳鳴已獨知之耳今吾所作汝俱知何謂

陰德哉故如韓韶李士
謙可謂得仁之施者矣

臣觀諸臣皆行不純儒而中心質實無欺世盜名利
祿自與之事使之及於孔門則顏閔參思之間未為
遠也但其志事近衰論久乃定
即當時人主亦未能盡知焉

表記曰子言之仁有數義有長短小大中心惓惓愛
人之仁也率法而強之資仁者也詩云豐水有芑武
王豈不仕詒厥孫謀以燕翼子數世之仁也國風曰
我今不閱皇恤我後終身之仁也子曰仁之為器重
其為道遠舉者莫能勝也行者莫能致也取數多者
仁也夫勉於仁者不亦難乎是故君子以義度人則
難為人以仁望人則賢者可知已矣又曰中心安仁者
天下一人而已大雅曰德輶如毛民鮮克舉之我儀
圖之惟仲山甫舉之愛莫助之小雅曰高山仰止景
行行止子曰詩之好仁如此鄉道而行中道而廢忘

身之老也不知年數之不足也倪馬曰有孳孳
斃而後已夫如表記所稱則可謂尊讓仁者矣

子曰無欲而好仁者無畏而惡不仁者天下一人而
已是故君子議道自己而置法以民子曰仁有三與
仁同功而異情與仁同功其仁未可知也與仁同過
然後其仁可知也又曰仁之難成久矣人人失其所
好故仁者之過易辭也夫子於仁之難成再致
歎焉故天下之尊讓仁者未有如夫子者也

臣觀夫子以同過論仁又曰觀過知仁即如上十六
條之事率心而行之事事有過必以過棄人則天下
無完人矣要其本於學
問澡身浴德不可少也

命儒章第十八

儒有不隕穫於貧賤不克詘於富貴不恩君王不累長

上不閑有司故曰儒今衆人之命儒也妄常以儒相詬
病孔子至舍哀公館之聞此言也言加信行加義終沒
吾世不敢以儒為戲

道之絀於勢者無他曰貧賤而已矣自以為貧賤則
貧賤之人也自以為富貴則富貴之人也貧賤富貴
人所自命衆亦共命之而皆有恩於君王累於長上
閑於有司儒者無有也衆所謂貧賤儒者不以為貧
賤衆所謂富貴儒者不以為富貴儒者亦仁而已仁
而後成人成人而後成天成天而後君王長上有司
之所從受命也易曰自天佑之吉無不利子曰佑者
助也天之所助者順也人之所助者信也履信思乎
順又以尚賢也是以自天佑之吉無不利是蓋王者
之事而儒者亦有焉儒者不以貧賤而慕富貴不以

富貴而傲貧賤亦不以貧賤而驕富貴富貴而引貧賤是則儒者之信順儒者之尚賢也故曰天命不佑有妄之事也自天佑之无妄之事也无妄之於大有其致一也不寶金玉不祈土地見利不虧其義見死不更其守身可危志不可奪近文章砥厲庶隅若此則何損獲於貧賤之有古之人有行之者原憲曾參巫馬期之徒是也懷忠信以待舉力行以待取難得易祿易祿難畜居處不淫飲食不溇上答之不敢以疑不答之不敗以諂忠信之義優游之法慎靜而尚寬弘毅以與人若此則何竟詘於富貴之有古之人有行之者蘧瑗季札子產晏嬰之徒是也難進易退齊難恭敬道塗不爭險易冬夏不爭陰陽先勞而後祿上通而不因陳言而伏靜而正之分國如錙銖不臣不仕若此則何恩君王之有衣冠中動作慎愛死有待養身有為戴仁抱義雖有暴政不更其所雖危起居竟信其志義同而進不同而退如此則何累長

上之有非時不見非義不合過言不再流言不極易
衣而出并日而食不臨深以為高不加少以為多並
立則樂相下不厭如此則何閔有司之有古之人有
行之者黃憲陳寔仇覽管寧徐穉申屠蟠沈麟士元
德秀孔嵩閔貢屠羊說之徒是也三代而下
溺於言說其有進於是行者蓋亦寡矣

臣觀聖賢所論人才成德大約盡於是編人主習觀
是編則取士之方盡矣宋儒高閔溺於時尚不知力
行求仁之說以為儒行一篇學不純經不宜與大學
中庸並稱考其意以毀方瓦合則張禹孔光見詆於
前相死相先則李杜尹劉見推於後然而容衆慮下
達人所稽義命久要孔門屢數道有不同歸仁一而
已故其終篇曰言加信行加義終沒吾世不敢
以儒為戲亦以教求仁之責精力行之未易也

魯哀公問於孔子曰吾欲論吾國之士與之為政何

如孔子對曰生乎今之世志古之道居今之俗服古之服舍此而為非者不亦鮮乎哀公曰然則今夫章甫句屨紳帶而搢笏者皆賢乎孔子曰否不然端衣玄裳冕而乘路者志不在於食葷斬衰簡屨杖而歎粥者志不在於飲食生今之世志古之道居今之俗服古之服舍此而為非者不亦鮮乎哀公曰善何如則可謂庸人矣孔子對曰所謂庸人者口不能道善言而志不邑邑不能選賢善而托身焉以為已憂動

行不知所務止立不知所定日選於物不知所貴從物而流不知所歸五鑿為政心從而壞若此則可謂庸人矣哀公曰何如則可謂士矣孔子對曰所謂士者雖不盡道術必有所繇焉雖不盡美必有所處焉是故知不務多務審其所知行不務多務審其所繇言不務多務審其所謂知既知之行既繇之言既順之若夫性命肌膚之不可易也富貴不足以益貧賤不足以損若此則可謂士矣哀公曰何如則可謂君

子矣孔子對曰所謂君子者躬行忠信其心不賈仁義在已而不害不知聞志廣博而色不伐思慮明達而辭不爭君子猶然如將可及也而不可及也如此可謂君子矣哀公曰善敢問何如則可謂賢人矣孔子對曰所謂賢人者好惡與民同情取舍與民同流行中矩繩而不傷於本言足法於天下而不害於其身躬為匹夫願富貴為諸侯而無財如此則可謂賢人矣哀公曰善敢問何如可謂聖人矣孔子對曰所

謂聖人者知通乎大道應變而不窮能測萬物之情性者也大道者所以變化而凝成萬物者也情性也者所以理然不然取舍者也故其事大配乎天地參乎日月雜於雲霓總要萬物穆穆純純其莫之能循若天之司莫之能職百姓淡然不知其善若此則可謂聖人矣哀公曰善孔子出哀公送之

臣觀是篇原始服行以列五品與儒行同意然而儒行精微矣儒行以弘毅為本以任重致遠為務於窮達不變造次顛沛不離之意同旨十六章百二十二義為參兩根本明主用之以贊襄天地得其一行一

事皆足以顯為王佐潛稱人師凡論語中所論古近
行事與孟子所論聖人丈夫先後合節也東漢諸儒
推準儒行以為人極其時武人稱子皆能特立砥厲
不藉誦說有以自見使大梟鉅雄如卓操之徒尚儼
俛以畏名士統天用人之主能採是篇以定士彙振
人心砥風俗辨爵位則公卿侍從常梟尹伯百執有
司黨正之屬咸就其職諛諂面諛狠
汚貪黷之徒可以不煩蕭斧而治也



儒行集傳卷下